




無錫金匱縣志

卷三十二之二十三

藝文詩

ル 5
3047
13



門 6
號 3000
卷 13

門 6
號 2300
卷 13

門 5
號 3047
卷 13

無錫金匱縣志卷三十二

藝文

志載藝文類有關於地方之掌故民生之利病山川之形勢非徒記登臨侈游讌爲士大夫之雅尚也詩自哀慕歌以降迄於近今風雅代興洪纖畢奏錄其尤者庶無戾於風人之旨文則採自獨孤及而下大都與志傳相參補至於諸家著述別存其目俾後之人有考焉然其佚者蓋不少矣志藝文第三十八

詩

商

昭和九年
六月十八日
購求

哀慕歌

古今樂錄泰伯既與虞仲逃去被髮文身託為王采藥
後聞太王卒還奔喪哭於門季歷謂泰伯長子也當立
垂涕而留之終不肯止遂委而去適於句吳是後季歷
作哀慕之歌

先王既徂長霞異都哀喪腹心未寫中懷音窠追念伯仲我

季如何梧桐萋萋生於道周治於宮館風雅逸篇作舒云

徘徊臺閣既除何為遠去使此空虛支骨離別垂思南隅

瞻望荆越涕淚交流伯兮仲兮逝肯來遊自非二人誰訴

此憂

漢

適吳詩

梁鴻

逝舊邦兮遐征將遙集兮東南心惓惓兮傷瘁志菲菲兮
升降欲乘策兮縱邁疾吾俗兮作讒競舉枉兮錯直咸先
佞兮嗷嗷固靡慚兮獨建冀異州兮尚賢聊逍遙兮邀嬉
纘仲尼兮周流儻云覩兮我悅遂舍車兮即浮過季札兮
延陵求魯連兮海隅雖不察兮光貌幸神靈兮與休惟季
春兮華阜麥含英兮方秀哀茂時兮逾邁愍芳香兮日臭
悼吾心兮不獲長委結兮焉究口囁囁兮予訕嗟恇恇兮
誰留

六朝

過歷山湛長史草堂

宋南平王劉鑠

茲山蘊靈詭憑覽趣亦瞻九峯相接連五渚逆紫浸層阿
疲且引絕巖暢方禁溜泉一作泉溜夏更深林交晝長蔭伊子
久緇惶復得味恬澹願逐安期生於焉愜高枕

歷山草堂應教

湛挺

閉戶守元漠無復車馬跡衰廢歸邱樊歲寒見松柏身慚
睢陽老名忝梁園客習隱非市朝追賞在山澤離離插天
樹磊磊間雲石持此怡一生傷哉駒度隙

無錫縣歷山集

江淹

愁生白露日思起秋風年竊悲杜蘅暮擘涕弔空山落葉
下楚水別鶴唳吳田嵐氣陰不極日色半窺天酒至情蕭
瑟憑尊還惘然一聞清琴奏歔泣方留連況乃客子念直
置絲竹間

無錫舅相送銜涕別

江淹

心遠路已迴意滿辭未陳曾風飄別蓋北雲竦征人盃酒
憐歲暮志氣非上春若無孤鳥還漉泣何所因

望震澤

江淹一作鮑照

瀾漫潭洞波合沓嶂嶸雲漲島遠不測岡澗近難分幽篁
愁暮見思鳥傷夕聞以此藉沈疴棲迹別人羣結言非盡

書有念豈敷文

亂後行經吳御亭

庾肩吾

御亭一回望風塵千里昏青袍異春草白馬卽吳門獯戎
鯁伊洛雜種亂轅轅輦道同關塞王城似太原休明鼎尙
重秉禮國猶存殷牖爰雖隕堯城吏轉尊泣血悲東走橫
戈念北奔方憑七廟略誓雪五陵冤人事今如此天道共
誰論

唐

題湛長史舊居

邱丹

無錫縣西郊五里有惠山寺卽宋司徒右長史湛茂之

之別墅也舊名厯山故南平王劉鑠有過湛長史厯山
草堂詩湛有酬和其文野而典特以松石自怡逍遙沈
寂終見止足之意可謂當時高賢矣至齊竟陵王友江
淹亦有繼作余登茲山以觀三篇列於石壁仰覽遺韻
穆若清風遽訪湛氏胄裔山下猶有一二十族得十三
代孫略執其譜書殘墨塵蠹年世雖邈塋隴尙存余披
宋史略不見其人心每惻歎悲夫斯人也而史闕書然
有其一篇則爲不朽矣因復追緝六韻以次三賢之末
時有釋若冰者踪跡茲山修念之餘鑿嵌注壑灑入諸
界無非金碧鉢帽之資悉償工價是以道友邑僚諷翫

佳賞嗚呼得非茂之之緣果而陰隲於上人不然何竭
慮之至耶余聖唐山令臣也屏居臨平山墅亦有年矣
嘗諷茂之篇句云衰廢歸邱樊歲寒見松柏不覺禪意
超散若在廬霍之間矣異時同歸猶茂之之不忘也嗟
乎湛君用刊巖石俟後之知我者得不繼之乎貞元
六年歲在庚午檢校尚書員外郎兼侍御史邱丹誌并
詩

身退謝名累道存嘉止足設醴降華幡挂冠守空谷偶尋
野外寺仰慕賢者躅不見昔簪裾猶存舊松竹烟霞雖異
世風韻如在矚余仰江海人歸轍青山曲

前題

韋夏卿

道勝物能齊累輕身易退苟安一邱上何必三山外雲霞
長若綺松石常如黛徒有昔主過竟遺青史載詩因野寺
詠酒向山椒酌異時逢爾知茲辰駐余旆

前題

李益

昔降英王顧屏身幽巖曲靈波結繁笳爽籟赴鳴玉運轉
春華至歲來山草綠青松掩落暉白雲竟空谷伊人撫遺
跡惻惻芳又縹云誰數美香分毫寄明牧

前題

于頔

蕭條厯山水木無紛滓王門結長裾巖扃怡暮齒昔賢

枕高躅今彥仰知止依依矚烟霞眷眷返墟里湛生久已
歿邱也亦同恥立言咸不朽何必在青史

前題

呂渭

巖居舊風景人世成今昔木落故山空猿啼秋月白誰同
西府僚幾謝南平客摧殘松桂花蕭散烟雲夕跡留異代
遠境入空門寂惟有草堂僧陳詩在石壁

伏覽呂侍郎邱員外舊題十三世祖歷山草堂詩因

書記事

湛賁

名遂貴知己道勝方晦跡高居葺蓮宮遺文煥石壁桑田
代已變池草春猶碧識曲遇周郎知音荷宗伯調逸南平
兆風清建安蹟祖德今發揚還同書史冊

題歷山司徒長史祖宅

湛賁

隳官長史籍高步歷山椒麗句傳黃絹香名播宋朝分能
知止足跡賁出塵囂松竹心長固池臺興自饒龍宮欣訪
舊鶯谷忝遷喬從事叨承乏銅章愧在腰

別惠山書堂

湛賁

捲簾曉望雲平檻下榻霄吟月半窗病守未能依結社更
施何術去爲邦

宿惠山寺

王武陵

戊辰秋八月吳郡朱遐景自秦還吳南次無錫命子及

故人竇丹列會於惠山之精舍是時山林始秋高興在目涼風白雲起於坐隅逍遙於長松之下偃息於盤谷之上仰視雲嶺俯瞰寒影夕陽西歸皓月東出羣動皆息視身如空元言妙論以極窮奧丹列有遯世之志遐景有塵外之心予亦樂天知命怡然契合視富貴如浮雲一歌一咏以抒情性夫良辰佳會古人所惜序述不作是闕文也山水之下景物秀茂賦詩導意以記方外之遊

秋日遊古寺秋山正蒼蒼泛舟次巖壑稽首金仙堂下有寒泉流上有珍禽翔石門吐明月竹木涵清光中夜何沈沈但聞松桂香曠然出塵境幽慮澹已忘

秋暮登惠山北樓

王武陵

秋老空山悲客心山樓晴望散幽襟一川紅樹迎霜老數曲清溪遶寺深寒氣急催遙塞雁夕陽高送遠城砧三年海上音書絕鄉國蕭條惟夢尋

宿惠山寺同玉晦伯竇丹列作

朱宿

古寺隱秋山登攀度林樾悠然青蓮界此地塵境絕機閑任晝昏慮澹知生滅微吹遞遙泉疎竹對殘月庭虛露華綴池靜荷香發心晤形未留遲遲履歸轍

重遊惠山寺

朱宿

無錫金匱縣志 卷三十一
歲月人間促烟霞此地多殷勤竹林寺更得幾回過

宿惠山同王晦伯朱遐景作

寶羣

共訪青山寺曾隱南朝人問古松桂老開襟言笑新步移
月亦出水映石磷磷予洗腸中酒君濯纓上塵皓彩入幽
抱清氣遠蒼旻信此澹忘歸淹留冰玉鄰

元和二年五月三日重遊此寺獨覽舊題二十年矣當
時三人皆登諫列朱遐景方詣行車王晦伯尋卒郎署
余自西掖累遷外臺復此躊躇吁嗟存歿朱拾遺詩云
歲月人間促烟霞此地多殷勤竹林寺更得幾回過可
謂得詩人之思也因命題壁以識所懷山南東道節度

副使檢校兵部郎中兼御史中丞賜紫金魚袋竇羣記
蘧舅氏扶風公貞元四年秋八月與太原王武陵吳郡
朱宿同遊惠山精舍爲賦往體詩一首王序而題之觀
其辭頗有世外之交出塵之想凝思澹慮泛溢天格雖
建安才人不足居其右矣後二十年復繼於末則有傷
時歎逝之感宿草鄰笛之悲洎會昌初武皇帝隳浮圖
法詔毀其宮而還其徒惠山在毀中時無好事者詩亦
隨塵焉今寺旣復而詩尙遺落內弟審餘寓書請於蘧
會蘧赴河陽辭召路出寺下因重記於軒廊南垣我舅
氏由吏部拜執法器業磊落爲時鉅人平生操尙備在

國史此不能舉所載者風韻之詞登臨之興俾後人挹其清芬而已大中十一年五月十三日懷孟等觀察使試大理評事兼監察御史李蓮重題

晨過昌師院

竇 羣一作李隲

深庭芳草濃曉井山泉溢林馥亂沈烟石澗侵經室幽巖鳥飛盡晴嶺雲歸密壁蘚凝蒼華竹陰漏晴日生期半宵夢憂緒仍非一若無高世心安能此中畢

赴無錫別靈一上人

劉長卿

高僧本姓竺開士舊名林一入春山裏千峯不可尋新年芳草遍終日白雲深欲徇微官去懸知訝此心

無錫東郭送友人遊越

劉長卿

客路風霜曉郊原春興餘平蕪不可望游子去何如烟水乘湖濶雲山逼越初舊都懷作賦古穴覓藏書碑缺曹娥宅林荒逸少居江湖無限意非獨為樵漁

惠山寺肄業送懷坦上人

詩 隲

太和五年四月予自江東將西歸潯陽路出錫邑因肄業於惠山寺居三歲其所諷念左氏春秋詩易馬遷班固史屈原離騷莊周韓非書記及著歌詩數百篇其詩凡言山中事者悉記之於屋壁文則不載其寺會昌末經廢毀屋室殆無存者去年蒙恩自禁職出鎮鍾陵與

毘陵地不相遠而惠山居其屬邑聞其寺復置會錫邑宰去年過此留宴數日令於予爲故人因寓書請再題焉嗚呼自太和癸丑至咸通己丑三紀餘矣念邑中居人與僧居在惠山興甯兩寺者今無人焉染翰增悲復何言耳咸通十年二月一日江南西道都團練觀察處置等使中散大夫檢校左散騎常侍使持節都督洪州諸軍事兼洪州刺史御史中丞上柱國賜紫金魚袋李

隲題記

流水何山分浮雲空中遇我生無根株聚散亦難固憶昨門龍春巖棲侶高步清懷去羈束幽境無滓汚日落九峯明烟生萬花暮茲歡未云隔前笑歎已故四時難信留百草換霜露離襟一成解悵抱將何諭驚泉有餘哀永日誰與度緬思孤帆影再出重江路去去忽悽悲因風慙回顧

自惠山至吳下寄酬南徐從事

李 隲

不接芳辰游獨此長洲苑風顏一成阻翰墨勞空返悠悠汀渚長杳杳蘋花晚如何西府歡尙念東吳遠瑤音動清韻蘭思紛盈畹猶及九峯春歸吟白雲巘

讀惠山若冰師詩集因題故院

李 隲

五天何處望心念豈皆知化堦留今日鳴泉自昔時古苔生石淨秋草滿山悲莫道聲容遠長歌白雪詞

高懷逢異境佳句想吟頻月冷松溪夜烟濃草寺春浮雲
將世遠清聽與名新不見開巖日空為拜影人

景物搜求歇山雲縱放飛樹寒烟鶴去池靜水龍歸暗榻
塵飄滿陰簷月到稀何年燈焰盡風動影堂扉

陰陰垂露蹟苔壁幾年書種樹青松老傳衣白髮居字工
窮八體詩律繼三閭豈是多年學真空任性餘

常聞鑿洞碑此立為冰師意到山泉解功深造化疑碧雲
終一謝飛錫久無期惆悵人間世空傳樂府詞

上家山

李紳

余頃居梅里常於惠山肄業舊室猶在垂白重遊追感

多思因效吳均體

上家山家山依舊好昔去松桂長今來容鬢老上家山家
山臨古道高低入雲樹蕪沒連天草草色日萋萋寒蟻徧
草啼噪鴉投樹遠行雁貼雲飛巖光分落日僧火開經室
竹洞磬聲長松樓鐘韻疾苔階滴溜缺石甃鋪莎密舊徑
行處迷前交坐中失歎息整華冠持盃強自歡笑歌連穉
孺絲竹縱吹彈山明淡月上酒滿心聊放髯髮此淹留垂
絲匪閒曠青山不可上昔士還惆悵况復白頭人追懷空
望望

憶東郭居效邱遲

李紳

昔余過穉齒從師昧知奧徒懷利物心不獲藏身寶曳婁
一縫掖出處勞昏早醒醉迷啜哺衣裳辨顛倒忠誠貫白
日直已憑蒼昊卷舌墮讒諛驚波息行潦衰禽識舊木疲
馬知歸道楊柳長庭柯蘭荃覆堦草旌旄光里舍騎服歡
妻嫂綠鬢絕新知蒼鬚稀舊老冠綏身忝貴齋沐心嘗禱
笙磬諒諧和庭除還灑掃棲遲還竹巷物役侵江島倏忽
變星霜悲傷滿衷抱

泛五湖效謝惠連

李紳

范子蛻冠履扁舟挽霄漢嗟予抱險難怵惕驚瀾漫窮通
泛溢勞趨適殊昏旦落日蕩層空浮天綠無畔依灘落葉
聚立浦驚鴻散浪疊雪峯連山孤翠崖斷風帆問巨壑雲
矗成高岸宇宙或東西星辰沈燦爛霞生頰洞遠月吐清
熒亂豈復問津迷休爲呂梁歎漂沈身詎保覆溺心嘗判
吳越羣異鄉嬰童反爲翫依稀古井邑嘹唳同鵝鸕舉權
永宵分維舟方日旰微彼濟川力若鼓凌風翰易狎當悔
游臨深罔知歎

憶放鶴

李紳

頃年無錫閑居里人獻鶴雛余馴養之周歲羽毛旣成
見其宛頸長鳴有烟霄之志開籠放之一舉冲天復迴
翔久之乃去

羽毛似雪無瑕點顧影秋池舞白雲閒整素儀三鳥近迴
飄清唳九霄聞好風任舉應摩日逸翮將成莫戀羣凌厲
坐看空碧外更憐鳧鷖老江濱

別泉石

李紳

惠山書堂前松竹之下有泉甘爽乃人間靈液清鑿肌
骨漱開神慮茶得此水皆盡芳味也

晴沙見底空無色青石潛流暗有聲微動竹風涵浙瀝細
浮松月透輕盈桂凝秋露添靈液茗折春芽泛玉英應是
梵居連洞府浴池今化醴泉清

鑑元影堂

李紳

故禪師鑑元影堂在惠山十年前師亦到壽州相見
香燈寂寞網塵中煩惱身銷色界空龍鉢已傾無法雨虎
牀猶在有悲風定心池上雙漚沒招手巖頭夢幻通深夜
月明松子落儼然聽石待生公

別雙温樹

李紳

余往年於惠山寺手植今葱翠蔽日此樹過江多死有
橘之狀

翠條盈尺憐孤秀移植書窗待月軒輕翦綠絲春葉暗密
扶纖幹夏陰繁故人手植空懷想温室深知不敢言為爾
拂雲今得地莫教陵谷改秋顏

重到惠山

李紳

再到石泉寺內有禪師鑑元影堂在寺南峯下頃年與
 此僧同在惠山十年鑑元到壽春相訪因追舊歡
 碧峯依舊松筠老重得經過已白頭俱是海天黃葉信兩
 逢霜節菊花秋望中白鶴憐歸翼行處青苔恨昔遊還向
 竹窻名姓下數行添記別離愁

憶惠山

李紳

故山一別光陰改秋露殘蟬歲月多松下壯心年少去池
 邊衰影老人過白雲生滅依巖谷青桂榮枯托薜蘿惟有
 此身長是客亦驅旌旆寄烟波

卻望芙蓉湖

李紳

丹樹村邊烟火微碧波深處雁紛飛蕭條落葉垂楊岸隔
 水寥寥間擣衣

水寬山遠烟嵐迴柳岸縈迴在碧流清晝不風鳧雁少卻

疑初夢鏡湖秋

逐波雲采參差遠背日嵐光隱見深猶似望中連海樹月
 生湖上是山陰

舊山認得烟嵐近湖水平鋪碧岫間喜見雲泉還悵望自

慚山叟不歸山

翠崖幽谷分明處倦鳥孤雲在眼前惆悵白頭爲四老遠

隨塵土去伊川

望亭驛酬別周判官

白居易

何事去長洲連宵飲不休醒應難作別歡漸少於愁燈火
穿村市笙歌上驛樓何言五十里已不屬蘇州

送陸羽歸惠山采茶

皇甫曾一作顧況

千峯待逋客香茗復叢生采摘知深處烟霞羨獨行幽期
山寺遠野飯石泉清寂寂禪燈夜相思磬一聲

登無錫北樓

郎士元

秋興因危堞歸心過遠山風霜征鴈早江海旅人閒驛樹
雲仍密漁舟晚自還仲宣何所賦祇歎在荆蠻

宴無錫蔡長官西亭

李嘉祐

茆檐閒寂寂無事覺人和井近時澆圃城低下見河興綠
芳草積情向遠峯多別日歸吳地停橈更一過

自蘇臺至望亭驛悵然有作因寄從弟紆

李嘉祐

南浦菰蔣覆白蘋東吳黎庶逐黃巾野棠自發空流水江
燕初歸不見人遠樹依依如送客平田渺渺獨傷春那堪
回首長洲苑烽火年年報虜塵

惠山寺流泉歌

皇甫冉

寺有泉兮泉在山鏘金鳴玉兮長潺潺作潭鏡兮澄寺內

泛巖花兮到人間土膏脈動知春早隈隩陰深長苔草處
處縈迴石磴喧朝朝盥漱山僧老林松自古草自新清流
活活無冬春任疏鑿兮與汲引若有意兮山中人偏依佛
界通仙境明滅玲瓏媚林嶺宛如太空臨九潭詎滅天台
望三井我來結綬未經秋已厭微官憶舊游且復遲回猶
未去此心只爲靈泉留

過惠山春申君祠

張繼

春申祠宇空山裏古柏陰陰石泉水日暮江南無主人彌
令過客思公子蕭條寒景傍山村寂寞誰知楚相尊當時
珠履三千客趙使懷慚不敢言

懷惠山寺

許渾

排空殿埵倚巖巒松韻經聲月裏寒兩眼流泉清戶牖九
龍飛雨灑闌干浣紗女弄金池影聽法烏啼施食盤借問
繡衣車馬客幾時林下脫儒冠

宿望亭館寄蘇州一二同志

許渾

候館人稀夜自長姑蘇城遠樹蒼蒼江湖水落高樓迴河
漢秋歸廣簟涼月轉碧梧移鵲影露低紅葉溼螢光西園
詩侶應多思莫醉笙歌掩畫堂

夜泊毘陵無錫縣有寄

羅隱

草蟲幽咽露初溥獨繫孤舟夜已闌濁浪勢奔吳苑急疏

無錫金匱縣志 卷三十一
鐘聲出惠山寒愁催髣髴凋何易貧戀家鄉別漸難他日
親朋應大笑始知書劍是無端

題惠山普利院

張祐

舊宅人何在空門客自過泉聲到池盡山色上樓多小洞
穿斜竹重階夾細莎殷勤問城市雲外暮鐘和

泛太湖

方干

長天接廣澤二氣共含秋舉目無平地何心戀直鉤孤鐘
鳴大岸片月落中流去憶鴟夷子當時此放舟

經無錫醉後吟

趙嘏

客過無名姓扁舟繫柳陰窮秋南國淚殘日故鄉心京洛
衣塵在江湖酒病深何須覓陶令乘醉自橫琴

懷錫山藥名離合體

皮日休

暗竇養泉容泱泱明園護桂放亭亭厯山居處嘗天半夏
裏松風儘足聽

曉景半和山氣白微香清淨雜纖雲實頭自是眠平石腦
側空林看鹿羣

題惠山寺

皮日休

千葉蓮花舊有香半山金刹照芳塘殿前日暮高風起松
子聲聲打石牀

惠山泉

皮日休

丞相長思煮茗時郡侯催發只憂遲吳關去國三千里莫笑楊妃愛荔枝

馬卿消瘦年纔有陸羽茶門近始閒時借僧廬拾寒葉自來松下煮潺湲

藥名離合體和皮襲美

陸龜蒙

鶴伴前溪栽白杏人來陰洞寫枯松蘿深境靜日欲落石上未眠聞曉鐘

佳句成來誰不伏神丹偷去只須防風前莫怪攜詩藁本是吳儂蕩漿郎

秦伯廟

陸龜蒙

故國城荒德未荒年年椒奠溼中堂邇來父子爭天下不信人間有讓王泉

題惠山泉

釋若冰

石脈綻寒光松根噴曉涼注瓶雲母滑漱齒茯苓香野客偷煎茗山僧惜淨牀安禪何所問孤月在中央

訪陸羽處士不遇

釋皎然

太湖東西路吳王古山前所思不可見歸鴻自翩翩何山賞春茗何處弄春泉莫是滄浪子悠悠一釣船

訪陸鴻漸不遇

釋皎然

移家雖帶郭野迳入桑麻近種籬邊菊秋來未著花叩門

無犬吹欲去問西家報道山中去歸時每日斜

酬皇甫冉將赴無錫雲門寄別 釋靈一

湖南通古寺來往意無涯欲識雲門路千峯向若耶春山
子猷宅古木謝敷家自是長俱隱那云相去賒

宋

泰伯祠 范仲淹

至德本無名宣尼以此評能將天下讓知有聖人生南國
奔方遠西山道始亨英靈豈不在千古碧江橫

題陸羽茶泉 王禹偁

磴石封苔百尺深試茶嘗味少知音惟餘半夜泉中月留

得先生一片心

芙蓉湖泛舟 胡宿

小湖香豔戰芙蓉碧葉田田擁釣篷嵐氣欲飛山隔岸秋
波不動水搖空翩翻雪鳥爭投浦撥刺霜鱗對擲風正是
滄浪濯纓日一竿多謝紫溪翁

即惠山煮茶 蔡襄

茲泉何以得適與真茶遇在物兩稱絕於余獨得趣鮮香
籬下雪甘滑盃中露嘗能變俗骨豈獨煎塵慮晝靜清風
生飄蕭入庭樹中含古人意來者庶冥晤

答和蘇公遊惠山寺 竇綱

寺枕青山遠俗氛解鞍憑檻對溪雲樓危鐸韻搖風響林
迴禽聲向暮聞紗護宿燈微有暈爐留殘篆半移紋拂衣
聊見禪扉靜頓覺塵勞此地分

題惠山寺

蘇舜欽

古寺名傳唐相詩三伏奔迸予何之青山相照翠會合碧
殿對影涼參差清泉絕無一塵染長松自是拔俗姿邊疆
雲擾日格鬪釋子晏坐殊不知

翠麓亭

丁寶臣

諦看軒軒面翠微暫來登此已忘機地連佛寺樓臺古泉
落山田稻蟹肥曉逕忽穿清氣入夜船多載白雲歸世人
誰識紅塵外終老功名未拂衣

寄題翠麓亭呈伯強寺丞

錢公輔

曩時曾作家山游亭有翠麓排新幽疎軒密牖竹鏘戛烈
風勁雨松颼颼呀然出戶瞰山足屹然數竿圍上頭掃除
雲峯聳客步煎煮錫水供茶甌我時既合眾賓飲醉岸山
幘心遲留山僧顧我丐詩榜詩未脫吻驚旋轉四方環走
倏已晚十載負約今方酬珍藍增葺想勝舊我已白首縻
藩州何當一賦歸去來再欵巖室窮披搜吾宗道人正嘉
遯擺脫世上無窮憂欣逢主人賢且令泉石笑傲都相求
上人灑掃莫暫閑行行逆我西來舟

寄伯強知縣求惠山泉

蘇軾

茲山定中空乳水滿其腹遇隙則發見臭味實一族淺深
各有值方圓隨所畜或爲雲洶湧或作綫斷續或鳴空洞
中雜珮間琴筑或流蒼石縫宛轉龍鸞蹙瓶罌走千里眞
僞半相瀆貴人高宴罷醉眼亂紅綠赤泥開方印紫餅截
圓玉傾甌共歎賞竊語笑童僕豈知泉上僧盥灑自挹掬
故人憐我病窮籠寄新馥欠伸北窗中晝睡美方熟精品
厭凡泉願子致一斛

和三唐人惠山詩

蘇軾

余昔爲錢塘倅往來無錫未嘗不至惠山旣去五年復
爲湖州與高郵秦太虛杭僧參寥同至覽唐處士王武
陵竇羣朱宿所賦詩愛其語清簡蕭然有出羣之姿用

其韻各賦三首

夢裏五年過覺來雙鬢蒼還將塵土足一步漪瀾堂俯窺
松桂影仰見鴻鶴翔炯然肺腑閒已作冰雪光虛明中有
色清淨自生香還從世俗去永與世俗忘

薄雲不遮山疎雨不溼人蕭蕭松徑滑策策芒鞋新嘉我
二三子皎然無緇磷勝遊豈殊昔清句仍絕塵弔古泣舊
史疾讒歌小旻哀哉扶風子難與巢許鄰

敲火發山泉烹茶避林樾明窗傾紫盞色味兩奇絕吾生

眠食耳一飽萬想滅頗笑玉川子饑弄三百月豈知山中
人睡起山花發一甌誰與共門外無來轍

贈錢安道兼寄其弟惠山山人

蘇軾

鴛鴦湖邊月如水孤舟夜傍鴛鴦起平明繫纜石橋亭慚
愧冒寒髯御史結交最晚情獨厚論心無數今有幾寂寞
抱關歎蕭生耆老執戟哀楊子怪君顏采卻秀發無乃遷
謫反更美天公欲困無奈何世人共抑真疎矣毘陵高山
錫爲骨陸子遺味泉冰齒賢哉仲氏早拂衣占斷此山長
洗耳山頭望湖光潑眼山下濯足波生指儻容逸少問金
堂記與嵇康留石髓

惠山謁錢道人烹小龍團登絕頂望太湖

蘇軾

踏遍江南南岸山逢山未免更留連獨攜天上小團月來
試人間第二泉石路縈迴九龍脊水光翻動五湖天孫登
無語空歸去半嶺松風萬壑傳

錢安道席上令歌者道服

蘇軾

烏府先生鐵作肝霜風卷地不知寒猶嫌白髮年前少故
點紅燈雪裏看他日卜鄰先有約待君投絃我休官如今
且作華陽服醉唱儂家七返丹

贈惠山僧惠表

蘇軾

行遍天涯意未闌將心到處遣人安山中老宿依然在案
上楞嚴已不看欹枕落花餘幾片閉門修竹自千竿客來
茶罷空無有盧橘楊梅尚帶酸

同蘇子瞻僧參寥和三唐人惠山詩 秦觀

輟棹縱幽討籃輿入青蒼圓頂相邀迓旃檀燎深堂層巒
澹如洗傑閣森欲翔林籟含雨溼岫日開雲光涓涓續清
溜靡靡傳幽香俯仰任登覽悠哉身世忘

使君厭機械所與惟散人顧慚蒹葭陋謬附瓊林新上千
青礫礫下屬白磷磷洞天不知老金界無棲塵緬彼人間
世烏瞻閱青旻記得踵三隱巖阿相與鄰

樓觀相復重邈然闕深樾九龍吐青泠灑灑曾不絕罌遞
馳千里真味猶未滅況復從茶仙茲焉越葵月岸巾塵想
消散策佳興發何以慰游嬉操瓢繼前轍

次君倚寄題惠山翠麓亭韻 焦干之

余愛茲山昔屢遊回環氣象冷清幽茂林蒼鬱疊蒼翠宴
坐瀟灑風颼颼密鬣積蘚迸泉眼飛翬比翼參雲頭逕邊
誰開青步障客來共泛紫玉甌每思乘興可獨往塵纓未
濯莫我留勝處未到心先厭健步歷覽氣挾軈生平趨向
與時背泉石夙志略已酬茲山獨以泉品貴乃得嘉名傳
九州譬人其中貴有物源深混混難窮搜知公此去久愈

無錫金園縣志 卷三十一 藝文 三
愛惠我佳句忘百憂忽蒙遠寄煮巖壑而我方欲千里求
願公早見疑蛇解急詔當應易剡舟

謝黃從善司業寄惠山泉

黃庭堅

錫谷寒泉楸石俱并得新詩蔓尾書急呼烹鼎供茗事晴
江急雨看跳珠是公與世滌羶腴今我屢空常晏如安得
左轡清潁尾風鑪煮茗臥西湖

張公爽墓芝

鄒浩

錫山居士張公爽廬墓側有芝三本生焉繪以爲圖見
者咨歎

此芝初無根生自孝誠裏孝哉本於誠非緣利心起無芝
非所作有芝非所喜不期芝有無秀出乃如此養志勤色
難送終極哀毀旣葬不忍歸結廬獨留止孺慕秋復春淚
接九泉水比鄰或未知天已知之矣因芝示邦人邦人爭
贊美會逢當路賢薦此八行始

惠山寺

蔣之奇

瀟灑攜家上翠微白雲凌亂繞人衣流泉噴薄山前去應
待元冬作雪飛

次韻蔣不同惠山行見贈

袁默

九龍山高茂松竹冉冉風光真潑綠重岡複嶺勞崢嶸五
里垂楊排岸曲雲生洞口若拖縑泉落田間如噴玉公垂

若冰遺跡在瀟灑儒冠與僧服夜蟾清影照寒流春鳥新
聲答寒谷山畔人家農事閒長得秋風魚稻熟太湖光射
夕陽閒澗澤相通材必育一生游賞心不足憶與高人時
住復夢魂還是念歸與問舍求田無百斛身名牽制悼人
心收拾未能如水覆侵尋白髮已盈簪方此徘徊干寸祿
樂安道人來自蜀尙爾小官身僕僕惠然相訪蓋初傾符
彩瑩顏神滿目徐言得道先辟穀二年粒米不入腹日南
先生韻超俗授術爲之留五宿天發殺機指下傳妙用圓
通皆智燭見我情親逾族屬勸以修持言滿軸自慚正類
雞伏鵠敢示精心循所祝痊除多謝枕中方臭腐豈爲刀

下肉斧斤牛羊肆殘毒古人已況牛山木深言元氣須引
續起我衰羸丸射鹿煩胸一訣願相傳卦體儼然存九六

惠山

袁默

山翁自合老林扃小有天中盡杳冥兩面樓臺驅作勢半
崖松石倚爲屏雲歸洞口紛紛見泉落池心細細聽勝景
深藏誰到此好須圖繪入丹青

留題惠山寺

張商英

元符己卯兩浙運判曾孝蘊作常潤京口奔牛二閘成
集英殿修撰發運使商英被旨相視遂至惠山寺留題
以記行役

咸陽獲璽之明年五月端午余泛船二開新成洞常潤組
練直貫吳松川淮南舵師初入浙借問邑里猶茫然茶經
舊說惠山泉海內知名五十年今日親來酌泉水一見信
異傳聞干置茶適自建安到青林石臼相爭先碾羅萬過
玉泥膩小瓶蟹眼湯正煎乳頭雲腳蓋盃面吸嗅入鼻消
睡眠滌缶操壺貯甘液緘題遠寄朱門宅仙人見水是琉
璃乃知陸羽非凡客

題惠山諫公竹軒

袁植

子猷喜種竹太白喜乘月俯仰雲泥間勝事俱清絕況乃
吾廬幽風烟浩一邱竹虛能受月華白月白能牽竹翠浮
不應玉壘李太白長對山陰王子猷未攜花下一壺酒已
登殘夜水明樓人間好景并四難無如月下青琅玕影搖
金鎖碎光動劔芒寒魂醒耿不寐哦詩坐長歎

與蔣仲任惠山觀溪漲

袁植

烟曳平川上雲屯翠嶺頭雨淫成大浸堤潰失安流地入
三吳窄山餘九隴浮不應昏墊後始用濟川舟

膠山寺

蘇紳

驅馬欵禪扉松風冷拂衣紅塵不到處青嶂此忘歸鳥望
生臺下雲侵講座飛楞伽味真趣轉覺俗緣稀

惠山寺并簡竇公

蘇紳

綺旎行盡入松門暫拂塵纓袖惹雲海月未升樓上見湖
波初起坐中間寶扉膜拜青蓮相石案傍行白氎紋促榻
偶隨居士語煮茶燒栗到宵分

寶乳泉

楊 偁

山名膠孰結泉味乳親嘗雲竇穿銀井冰蠶貯玉漿竹陰
濃處冷松子落時香不雨潺潺響無風瑟瑟光粉源初滴
漉珠派遠汪洋曲注分環砌方澄引鑿塘趁齋僧洗鉢就
讌客浮觴稻漬麇牙飯茶煎蟹眼湯繼毫龜鑑徹盈腹暑
襟涼農畝霑甘潤膏腴穫萬箱

四亭詩為錢紳仲作

蔡 載

著亭傍林泉偶與初心期佳處時自領未應魚鳥知
白雲何時來英英冠山椒西風莫吹去使我心搖搖
高人不惜地自種無邊春莫隨流水去恐汚世間塵
水行天地間萬派同一指胡為穿石來要洗巢由耳

翠麓亭

楊 傑

聞說支公最好賢瀛洲可買不論錢樓臺蔽日都無地草
木藏春別有天石上雲翻千峽雨洞中泉落幾家田高閣
誰似幽居樂一坐青山不問年

遊惠山

蔣之美

絕頂疑天設重門一徑深泉清千古意松老百年心高閣

窺平陸危亭倚翠岑勝遊方自適猶恐日西沈

遊惠山

蔣之美

維舟上重巘景物近斜暉流水連珠落殘花碎錦飛白雲
隨步武香鳥傍軒扉拂井松傾蓋緣崖蘚上衣池光清可
鑑竹色翠成圍更接高僧話林梢帶月歸

通惠泉爲錢紳仲作

葛勝仲

山翁徹骨清日飲一瓢水天公隱其窮殆將貽石髓先救
西神君一派疏清泚初驚石罅出盈科來未已其瀦爲淵
潭其滙則沼沚酌彼九龍泉錫味參差是一甌紫筍春牙
頰留甘美餘波供濯纓濺沫邀洗耳山中有異事喜甚屐
折齒長安昊天觀秦吳隔千里妄云脈絡通道人眞疏矣
寄語贊皇公未應停水遞

宋陪制置朱工部正辭惠山泉詩分得雲字

蘇儀甫

醲液璇源世味珍陸經甄品始流聞千尋深異江心汲兩
派元因嶺上分輕發茗花憑七箸散爲膏澤待風雲一篇
此日攜鴻藻五色他年浴鳳文

濟川諸公同遊惠山因成長韻

錢紳

好山如佳人變態百種好陰晴朝暮間可愛不可道時時
思一見如垢人不澡我來正清秋令人豁懷抱秋色佳有

餘俗客跡如掃佳哉二三友在席每傾倒杖策窮縈迴高
 絕須一到幽尋不厭倦遇境即窮討階前千歲松閱盡眾
 木槁亭下百尺井空傳天眼老陸子賞遺味至今泉浩浩
 高僧挂衣去誰識衣中寶九淵深非龍徒見腓百草眾泉
 失蹊徑迸散不可考世事每如此所合輒顛倒夜深山色
 清更對冰輪皓林梧影參差水中交荇藻迴櫂艤波心如
 在蓬瀛島舉觴望青天醉鄉得深造茲遊須再嗣萬事殊
 未保

華藏寺

錢紳

窈窕招提入翠微碧波千頃照巖扉白頭僧向斜陽立黃
 帽人衝細雨歸芳草遠從湖外見殘雲紛繞雁邊飛分明
 一片家山景卻憶松間筍蕨肥

題雲海亭

姜夔

茫茫復茫茫中有山青蒼大哉夫差國坐占天一方夫差
 醉蓮宮巨浪搖不醒越師從何來奪我玉萬頃至今亭上
 秋一遂萬古愁誰能知往事飛下雙白鷗

泰伯廟

蔣堂

泰伯何爲者不以身爲身遜避天下位奔走句吳濱隱德
 照來世遺祀傳斯民吁此廉讓國合生廉謙人

惠山泉

劉遠

靈脈發山根涓涓才一滴寶劍護深源蒼珉環甃壁鑿影
鬢眉分當暑挹寒冽一酌舉瓢空過齒如激雪不異醴泉
甘宛同神瀆潔快飲可洗胸所惜姑濯熱品第冠寰中名
色固已揭世無陸子知淄澠誰與別

龍淵即龍
縫泉

劉遠

巖巖白石嵌深泉適此止夜雨半山回春風蟄龍起清明
無遁形溥博有餘美受濁不傷清納污非所恥趣操比幽
人泓澄如得已山林乃挺途真復誰洗耳

青山寺

尤表

崢嶸樓閣插天開門外湖山翠作堆蕩漾烟波迷澤國空
濛雲氣認蓬萊香銷龍象輝金碧雨過麒麟剝翠苔口二十
九年三到此一生知有幾回來

題安陽山翠微寺

唐綽

平地巍然起一峯歷山西畔漏湖東勢侵雲漢千尋直影
落烟村四面同龍窟正當螺髻頂僧居端坐畫圖中邦人
不獨資觀賞旱歲為霖更有功

惠山雲開復合

楊萬里

二年常州不識山惠山一見開心顏只嫌雨裏不子細彷彿
隔簾青玉鬢天風忽吹白雲折翡翠屏風倚南極正綠
一雨染山色未必雨前如此碧看山未了雲復還雲與詩

人偏作難我船自向姑蘇去白雲穩向山頭住

題陸子泉上祠堂

楊萬里

先生喫茶不喫肉先生飲泉不飲酒饑寒祇忍七十年萬
歲千秋名不朽惠泉遂名陸子泉泉與陸子名俱傳一瓣
佛香炷遺像幾多衲子拜茶仙麒麟畫圖冷似鐵凌烟冠
劍消如雪惠山成塵惠泉竭陸子祠堂始應歇山下泉中
一輪月

尤延之侍郎屢求作遂初堂詩詩未成延之去國因

以奉送

陸游

印何纍纍綬若若只堪人看公何樂忽然捩柁開布颿慰
滿平生一邱壑遂初築堂今幾時年年說歸真得歸異書
名刻堆滿屋欠伸欲起遭書圍舍之出遊公豈誤綠髮朱
顏已非故請將勳業付諸郎身踐當年遂初賦

惠山齋中聽雨

李祥

雲冷銀蟾遯香寒寶篆遲輕雷新破夢好雨故知時池荇
陰抽帶山茶暗展旗空階聞夜響楚客起題詩

自題雲龍小隱

蔣重珍

龍山錫山兩山雲出能爲雨入爲晴雲山之氣有歛散歛
散之理斯爲神我廬山下有小隱雲爲動兮山爲靜悠然
而出物之澤屹然而峙地之鎮我見雲山喜與俱雲山無

無錫金匱縣志 卷三十一
情不見余我比雲山多此見不如一似雲山無

秦太虛墓

張理

九峯朝暮雲搖落少游墳野蔓碑全沒晴菴磬亦聞洞偏
泉路細松折鶴巢分高視太湖近雲濤鷗起羣

碧雲塢

李維

坐久三峯晚望中疑碧雲不應談世事自是出塵氛嘉木
層層見秋聲處處聞佳人端可待風景欲平分

登雲海亭

嘉熙庚子清
明前一日

邱岳

幽尋到華藏峻嶺穿林霏玉鑑水千頃翠屏山一圍雲濤
浩莫測瀛海是耶非馬鬣葬英骨鷗夷脫危機問君借沙
觜容我著釣磯狎鷗似相識來近闌干飛

題膠山寺壁

元擊

岡頭鶉鴉鳴定欲喚晴雨驅車指東山山下寺亦古道人
雙眼青雪齒起柔語松回萬壑風落絮趁輕舞日暮詠歸
與扁舟在烟渚

前湯普濟菴

陳炤

一尖龍舌地蘭若此中開曲徑深依竹荒池淺鑿苔要令
溪水接莫礙野雲來只恐菴居興難淹出世才

弔五牧

五牧在無錫縣
西北四十里

文天祥

予初以朝廷遣張全將淮兵二千救常州以其爲淮將

必經歷老成遂遣朱華將二千人從之張全無統馭之才自爲畦町十月二十六日提淮軍自往橫林設伏虞橋北兵至麻士龍死之張全不救走回五牧五牧乃朱華所駐如掘溝塹設鹿角張全皆不許二十七日北兵薄朱華自辰至未朱華與廣軍與之對北兵自路塘直來死於水者不可計至晚北兵繞山後薄贛軍尹玉當之曾全胡遇翁雲曾玉先遯尹玉死焉張全提軍隔岸不發一矢有利災樂禍之心吾軍渡水挽張全軍船張全令諸軍斷挽船者之指於是溺死者甚眾張全并宵遁惟尹玉殘兵五百人與北兵角一夕殺北兵及馬委

積田間質明止有四人得歸嗚呼使此戰張全稍施手援可以大勝捷一夫無意事遂關宗社嗚呼天哉予初欲先斬張全然後取一時敗將並從軍法以張全爲朝廷所遣請於都督乃宥張全使自贖予遂不及行法後詣餘杭發京師取曾全以徇眾而噬臍多矣過五牧弔戰場爲之流涕不可禦

首赴勤王役功成事則天富平名委地好水淚成川我作招魂想誰爲掩骼緣中興須再舉寄語慰重泉

過無錫

文天祥

已未歲予攜弟璧赴廷對嘗從長江入裏河趨京口回

首十八年復由此路是行驅之入北感今懷古悲不自勝

金山冉冉波濤雨錫水茫茫草木春二十年前曾去路三千里外作行人英雄未死心先碎父老相從鼻欲辛夜讀程嬰存國事一回惆悵一霑巾

同蘇子瞻秦太虛和三唐人惠山詩 釋道潛

山烟炁滅沒山木含葱蒼剩舟傍遙岸理策升虛堂週遭矚層巒矯矯如翱翔下瞰平田流澹然淨日光青篁解初籜洗雨聞清香雖云迴前途真賞豈易忘

杜門暗朝雨寂歷無行人陰曦忽穿漏卉木鬱已新階泉

漱玉齒照眼光磷磷使君美無比卓犖遺囂塵風標傲柏竹談笑凌蒼旻何愧沈冥子臥霞與結鄰

揚帆渡江來洗眼驚翠樾雲姿既容裔鳥弄更清絕凌梯訪仙蹤金石亦未滅嗟我魚目光疇能綴明月狂墨掃琅玕風烟坐中發殊勝區中人茫茫走飛轍

偃松 聽松軒

釋道章

得地久蟠踞參天多晦冥月通深夜白雲壓歲寒青獨擁虬腰大疑聞兩甲腥深根動坤軸蕭瑟挂疏星

雲海亭

釋法尙

目前多少古今情盡在太湖之上亭舸艦浮空雲影亂鐺

鏤沈水浪花腥一盃漱澗含雲夢數點蒼茫認洞庭明日
惠山曾有約又攜茶鼎汲清冷

無錫金匱縣志卷三十一終

無錫金匱縣志卷三十一



詩

元

梁谿謠贈盛高霞道士

柳貫

梁谿一片月搖蕩綠蘿烟玉女采珠回駕龍耕璧田春去
竹花實歲深芝草駢鳳凰招不下遲景惜留連卻望白雲
嶠明星正當天雲中青童君招麾使之前謂言寶訣書列
在瑤臺編蚩尤守局鑰一閱三千年至今海嶽閃光氣常
蜿蜒茅龍亦解飛金匱豈徒堅引手探元策得之可登仙
首路向恒碣西窺臨岳蓮天壇見日出皓鶴共蹠蹻行攀

無錫金匱縣志 卷三十三
飛狐塞回薄扶桑淵滄溟挹不滿石廩小如拳還尋屏風
疊鼓柅凌中川調笑呼陸羽濯纓第二泉但聞丹齊成不
見朱顏遷顛露薦冰液雄虹爲采壇上下八景中窅然觀
化先何必肩洪厓遂將儕傭佺甯能獨不死爲我啟真詮
大還容草創小劫度沈綿桂枝倘堪結遲贈遠游篇

惠山夏日酌泉燕集

鄧文原

我生懶拙百不堪放意林壑窮幽探茲山九龍勢飛動鬢
鬢錯落盤松桫高風吹衣凌險遠太湖渺渺天西南泉流
不逐湖波逝融爲冰鏡開塵函六月火雲生熱惱三嚙冰
雪開清甘試將水晶證泉味一語須喚山僧參層臺桑苎

肖遺像古屋彌勒空香龕五年兩歷惠山頂未辦草具來
卓菴白鳥翻風導先路碧雲垂地隨歸驂酒醒呼枕聽風
雨老龍卷水空溪潭撫掌歡游已陳迹隱隱孤舟沈暮嵐

送徐元度

虞集

起家辟掾三公府拄笏西山度歲年故舊總懷天下士風
流更重幕中賢香烟滿袖遊絲夢春水如天上計船三月
看花鴈鷺裏題詩還向遠人傳

溪山勝槩樓

揭傒斯

目極高深思渺綿華家樓閣好山川風光流轉酣歌裏烟
水微茫徙倚前地足蒲荷連夏沼年豐黍稌滿秋田多藏

陽羨先春茗日試山中第二泉

題惠山寺

湯仲友

梁谿停短櫂帶月步西關路盡忽逢寺松多不見山巖腰
雲殿古洞口石泉閒到此正吟苦秋聲滿樹間

惠山寺行殿

宋高宗駐蹕於此

杜竹處

渡江五馬竟忘歸愁見年年雁北飛千里版圖非故國六
朝基緒幾危機烟藏經葉閒僧錫風落松花上客衣前輩
衣冠已塵土空留碑碣枕斜暉

留題惠山

柯九思

騎馬東華塵滿道山川如此不曾來清泉白石何年有翠
竹蒼松古殿開幽人試水嘗春茗過客題詩坐雨苔杖藜
絕頂便疏曠日暮浮雲天際迴

送王誠夫知無錫州

柯九思

黃金橫帶爛輝光出守甯辭道路長鴈序久陪蒼水使鳳
池曾赴紫微郎雙旌坐鎮清溪月列戟看凝燕寢香肯汲
惠山泉見寄青春煮茗當還鄉

遊惠山寺

王仁輔

紅杜溪頭艤小舟青蓮宇內作清遊土花繡壁淡如畫嵐
翠潑雲濃欲流短李清風存古意大蘇團月洗春愁摩挲
泉石舒長嘯未羨神仙十二樓

五牧

張翥

苦戰勤王事精魂泣鬼雄
壞城兵氣黑遺鏃血花紅
故老談亡國明時錄死忠
長吟一搔首落日鳥呼風

七月之集慶次無錫宿元文館

張翥

海月光芒溼川雲意緒閑
剛風浮地外元氣滿人間
野梅歌相答漁燈去不還
電明知有雨只在九龍山

中秋望亭驛對月

代祀北還

張翥

月色滄波共渺茫驛亭雜坐看湖光
仙家刻玉青蟾兔帝子吹笙白鳳凰
蘆葉好風生晚思桂花清露溼空涼
回槎使者秋懷潤倒瀉銀河入酒觴

次元鎮伯雨錫山倡和之作

張翥

鶴在青林鳳在阿騷人行處有吟窩
西風落木秋來早南國浮雲日暮多
欲賦朱華臨鄴水可堪白芷怨湘波
期君不負湖山約來聽吳儂欸乃歌

謁李忠定公祠

陳方

丞相非腐儒慷慨遭國難平生痛哭心
忍死抱長算嗚呼百歲後寂寞誰享禩
至今空山中祠宇安厓岸鳥跡上香臺
棲塵落風幔山僧雖異流展像亟稱讚
飄飄風塵際黃屋任鼠竄不有左轄尊
至今猶扼腕公留人心安公去人心亂
桓桓神將軍一鼓銳而悍所至繫其頸
小衲何足憚

魏公經濟才安劉左吾袒傾蓋出流離中情始冰泮倉皇
青城役慘澹失神觀豈無婁敬策尙足勤修捍落落付空
言悠悠惜神斷聲名字宙間草草入嗟歎

和華彥清宿洞虛宮

陳方

真館時時到仙花樹樹幽西風寒入竹北斗夜當樓頗覺
乾坤異甯爲歲月憂乞分筇竹好相伴赤松游

遊惠山

陳方

僧居高處接雲霞村市周遭石徑斜細細山泉爭入澗雙
雙水鳥靜眠沙佛前風動杪樞樹溪上春留躑躅花十五
年來頭漸白倚闌仍舊一烏紗

題惠山寺

鄭元祐

百里盡平壤茲山忽中蟠硤研得宏深迂徐納平寬僧坊
隱其腹崇構居桓桓立神衛觚稜綠雲置闌干我來元冬
交榜舟起微瀾天連黃沙白露委青林丹地無車馬塵松
筠正堅完蒼然後凋意彼此不厭看稍稍陟其崖深源汲
甘寒其惟桑苧翁出處良獨難帝青九萬里冥飛見修翰
空留雪泥迹莫究清靜觀警茗滌愛渴晏然有餘歡

溪山勝槩樓

陳顯曾

江南二月羅衣裳藤花滿地山雲香背人小燕撇波去朱
簾白日游絲長蒲茸綠淺芹芽紫沙上輕輕溼飛雨美人

無錫金匱縣志 卷三十三 五
遙盼木蘭舟一夜相思隔春水

溪山勝槩樓

張思廉

九龍山下梁溪水水色如藍山色紫一聲欸乃雁初飛十
二闌干人獨倚琵琶撥斷冰絲結滿地青蘋落秋雪隔窗
最是拒霜花下有鴛鴦睡明月

留題時思精舍

李士行

策馬九峯道行行如山陰勝景不暇接爽氣襲衣襟悠哉
時思菴寫我千古心修竹秉高節流水響清音日暮下山
去疏鐘烟霧深

宿元文館

張雨

十日閉春院草積青苔厚稍止侵窗雨爭鳴決渠溜想見
螭口泉玉色動欄檻便尋雙鳧舄翻飛入烟岫

寄題時思精舍

張雨

重遊九龍峯寒食生春陰竹露灑我笠松風吹我襟況逢
金閨彥幽探愜素心風泉繞屋壁亂響琴筑音翻然出谷
去回睇烟蘿深

上巳日遊惠山

張雨

水品古來差第一天下不易第二泉石池漫流語最勝江
流湍激非自然定知有錫藏山腹泉重而甘滑如玉調符
千里辨淄澠罷貢萬年離寵辱虛名累物果可逃我來爲

無錫金匱縣志 卷三十三
泉作解嘲速喚點茶三昧手酬我松風吹兔毫

與倪泰宇遊無錫華藏

張雨

湖上亂峯如髻鬟湖邊才子駐金鞍霜餘鸚鵡沙汀淺日落麒麟墓道寒古壁風篁無盡意清尊雲海有餘歡遠遊未羨鴟夷子直向飛仙乞羽翰

春日雲林齋居

倪瓚

池泉春漲深徑苔夕陰滿諷詠紫霞篇馳情華陽館晴嵐拂書幌飛花浮茗盃階下松粉黃牕閒雲氣暖石梁蘿薦垂翳翳行跡斷非與世相違冥棲久忘返

與張貞居雲林館燕集分得春字

倪瓚

青苔網庭除曠然無俗塵依微樵路接曲密農圃鄰鳴禽已變夏疏花尙駐春坐對盈尊酒欣從心所親

元文館讀書

有序

倪瓚

余友元中真師在錫之東郭門立靜舍名元文館幽潔敞朗可以閱處至順壬申歲六月余寓是兼旬謝絕塵事遊心淡泊清晨櫛沐竟終日與古書古人相對形忘道接翛然自得也且西神山下有泉味甚甘冽與常水異館去山不出五里故得昕夕取泉以資茗菴余讀書研道之暇時飲水自樂焉乃賦詩記事

真館何沈沈寥廓神明居陽庭肅宏敞月林鬱扶疏瞻言

無金金匱集元 卷三十三
茲遊息脫屣榮祿區檐棖初日麗池臺涼雨餘焚香破幽
寂飲食聊舒徐潛心觀道妙諷詠古人詩懷澄心自怡意
愜理無遺誰云黃虞遠泊然天地初回首撫八荒紛攘虬
蟬如願從逍遙游何許崑崙墟

寄題時思精舍

倪瓚

我生劬馳騫無機如漠陰重遊古蘭若對山開我襟風流
李謫仙賞靜諧夙心琅然哦新詩如聞大雅音回首石林
晚白雲花雨深

題惠山

倪瓚

重過湛公宅因嘗陸子泉佛香松葉裏僧飯石巖前市駿
誰憐馬荒池憶種蓮清心有妙契塵事已長捐

溪山勝槩樓

倪瓚

樓下清溪夏亦寒溪頭箇箇白鷗閒風迴綠卷平堤水林
缺青分隔岸山若士振衣千仞表何人泛宅五湖間絕憐
與子同清賞定向雲霄其往還

聽秋軒

在祇
隆寺

倪瓚

聽秋軒裏聽秋雨定起山僧坐翠微隱隱烟濤搖夜席濛
濛花雨著人衣驟如崖瀑衝雲落宛似湘靈鼓瑟希六月
塵根今已淨松篁陰下共香霏

清閟閣

倪瓚

無錫金匱縣志 卷三十三
眼見藤梢已過牆手拈書卷復堆牀閒臨水檻親魚鳥欲
出柴門畏虎狼冠製不嫌龜殼小衣裾新翦鶴翎長從來
任拙惟疏懶一月秋陰不下堂

晚泊新安有懷九成

顧瑛

夜泊新安驛西風八月天人家溪樹裏晚飯柁樓前水落
星移石雲開月墮船遙思佩韋者癡坐不成眠

登惠山和韻

于立

秋水放船來野寺寒崖古石路峻嶒鶴棲雲外三珠樹猿
掛烟中百尺藤古殿金銀黃面老小龕香火白頭僧明朝
城市多塵事何日重來一再登

前朝古寺倚崔嵬快聽松風上古臺一勺靈泉通地遠九
峯龍氣抱天迴清暉娛人不少住黃土眯眼何當開歸舟
贖載煎茶水更帶新詩入郭來

和顧仲英晚泊新安見懷韻

鄒韶

長林夕露下一雁過青天月照風燈外星沈野水前美人
隔烟渚清夢落江船孤坐聞城漏迢迢夜不眠

遊惠山

陳邁一作

空山微雨後啼鳥早春時雲氣侵衣潤泉聲出寺遲清茶
方破夢新酒復催詩了卻公家事重來再與期

往揚名開化二鄉掩骼

王逢

無金金園集卷三十三
分藩多賢勞不敏參賓客雖無官守縻亦復與言責二鄉
虔劉禍慘甚長平厄先王制禮經孟春當掩骼僕夫有難
色款段纔任策駸駸度岡坂渺渺循藪澤稍稍烟微青厯
厯野四白游魂行草上遺老候道側我豈物役徒茲來出
心臆皇天久下憫赤子非寇敵鳴鳥何不仁銜啄血更瀝
因歌戰城南風悲淚狼藉

洞虛宮玩月

王逢

獨立髣蕭騷天風吹綺袍石牀秋後薄香殿月中高句落
丹山鳳神游滄海鼇仙人渺何所靈響度雲璈

山中春晚

趙若巖

山空行跡少地迴落花多草長迷香澗松高掛女蘿林深
猿鳥下徑靜鹿麋過春事今云暮其如懷抱何

登鹿頂山

華幼武

雨洗春泥輭山高興轉孤振衣凌絕頂拊掌望平湖塵霧
遙迷楚烟花直過吳乾坤萬里濶不泣阮生塗

中秋夜泛舟鵝湖

周翼

八月十五夜何其鵝湖漾舟人未歸水生金浪兼天湧雲
度青冥傍月飛鴻雁沙寒微有影芰荷秋冷不成衣古人
一去渺何許黃鶴舊磯今是非

登惠山和韻

陳基

欲叩沙門大小乘西風飛屨過峻嶒空山金碧鏘流水絕
壁龍蛇走亂藤一室香花同聽法百年雲水不如僧何時
更整山翁屐寶地相從取次登

霜作楓林葉作堆秋高蕭寺客登臺排空列嶂千重合出
谷流泉百折迴瀕洞烟濤塵海濶參差樓閣化城開獨憐
萬里關河鴈不寄天涯一字來

登惠山和前韻

陸仁

惠山秀拔南蘭陵大雄宮殿開峻嶒登高未試九節杖攀
險且攬萬年藤泉頭已無裏茗客峯頂或有巢雲僧梁溪
歸槩追落日杵聲何處響登登

西神秋色清於水下馬長林坐石臺山鷓忽鳴衝樹過巖
花欲落受風迴松聲暗與泉聲答龍氣朝隨霧氣開桑苧
祠前無限思明年試茗擬重來

登惠山和前韻

周砥

九龍之山天外青寺門巖壑寒峻嶒水流秋澗渾疑雪路
轉陰廊或礙藤刻石定傳霞上作具茶應喜竹閒僧卻憐
獨臥滄江者何日杖藜還共登
行盡疏林黃葉堆青蓮境界起樓臺雨分山氣空中落雷
挾泉聲地底迴磬響驚人溪路隔香烟滿袖殿門開誰知
拂石題名處顧愷前身今再來

留題惠山

移刺迪

參差樓閣古招提猶有唐人石上題潭影空明天上下
蘇痕生澁路高低泉香茗細僧清供竹密花深鳥亂啼
已負牛生巖壑趣馬蹄羞踐綠莎泥

惠山留贈真長老

馬治

殿門高拱碧崔巍慚愧名僧此日來辛苦欲興泉上寺
蕭條爲掃劫殘灰九龍雲氣諸天繞萬象潭心一鏡開
洞酌便同甘露灑下方思見古風迴

自仙源過祇陀懷元鎮

范致大

扁舟蕩槳出東城最愛新流拍岸平霽雨蘭苕來翡翠晚

風楊柳送鸝庚盈盈溪女臨沙浣歷歷郊農傍隴耕
謬倚林齋望山郭憶君清話不勝情

題麻監州墳

在邑西郊

范致大

一日孤墳起翠微空山草木亦生輝
賀蘭竟後霽雲死杜季甯遲馬援歸
義魄不隨黃土化英靈長共白雲飛
篤交郵幼端奇事慚愧梁溪一布衣

雲林草堂答元鎮次韻

楊維禎

坐斷深林事不聞西窗風日愛餘曛
舊經高赤尋三傳新詠山王削五君
翠篠侵牀落蒼雪石池洗硯動元雲
東鄰書屋最相憶莫遣草堂移浪文

訪倪元鎮不遇

楊維禎

霜滿船篷月滿天飄零孤客不成眠
居山久慕陶宏景蹈海深慚魯仲連
萬里乾坤似水一窗燈火夜如年
白頭未遂終焉計猶欠蘇門二頃田

題惠山寺

釋明本

惠山屹立千仞青俯瞰大地鴻毛輕
七竅既鑿混沌死九龍攫霧雷神驚
霹靂聲中匡石裂銀泉迸出青鉛穴
惟恨當年桑苎翁玉浪翻空煮春雪
何如跨龍飛上天併與挈過崑崙巔
散作大地清涼雨免使蒼生受辛苦
我來叩泉泉無聲一曲冷光沈萬古
殿前鳳檜晝然鳴日暮山靈打鐘鼓

鐘鼓

題雲林居

釋良琦

每憶雲林子隱居清且閒
褰裳采芝秀倚杖看秋山
微雪松陰暝青苔石上斑
韓康偏有意時復到柴關

明

夜投西神寺

高啟

江月上秋衣來敲遠寺扉
棲禽驚客至睡僕訝僧歸
鐘度行廊盡燈留浴院微
非無招旅館禪定欲相依

寄惠山熙書記

高啟

禪居紫閣陰欲去問安心
野岸隨流曲山門隱樹深
千燈

然雨塢一磬出風林想見跣跡處雲深不可尋

惠山春申君廟

高 啟

封君開巨壤相楚服強鄰名重三公子謀疏一婦人畫幃
留古像珠履絕遺塵簫鼓時迎祭還憐舊邑民

寄懷雲林草堂

高 啟

名落人閒四十年綠蓑細雨自江天寒池蕉雪詩人晝午
榻茶烟病叟禪四面荒山高閣外兩株疏柳舊莊前相思
不及鷗飛去空恨風波滯酒船

無錫道中

張以甯

疊橋隨港直聯木護堤偏村落皆通水人家半繫船橋花

香曙露楊葉澹寒烟中土何寥廓黃沙人種田

賦得泰伯廟送倪元鎮

袁 凱

翦商肇基迹傳季思逮聖兄弟逃荆蠻讓德一何盛千家
聿來從句吳始開境遙遙至裔孫欲大心愈騁深宮貯妖
麗高堂瞰遐迴既拒伍胥忠還甘太宰佞鄰邦樹讐怨上
國肆爭競社稷終變遷軒楹獨完正相傳在閭里灑掃政
嚴淨歲時具牲醴歌舞勞送迎楚鬼久無食越魄誰將縈
強暴有湮晦聖哲無終竟於焉送將歸舟艫得依並是時
春氣和氤氳滿芳徑渚花動幽彩汀蒲發深艷江水去不
息烟霞日將暝斂衣拜階下懷哉起孤詠

望惠山

王惟允

昔者歲庚戌承檄離故鄉遽與此山別關陝隔異方緬懷
林壑姿令人歸思長瀟灑棲白雲青松蔭石牀泠泠第二
泉流潤石髓香今辰罷官守春風促歸航青青九龍峯鬱
然當我藏我本江海人泉石有膏肓一從罽塵網鬢髮已
蒼蒼寄謝桑苧翁卜鄰漪瀾堂

題青山白雲圖

錢仲益

連山盤盤隔溪水翠滴嵐光淨如洗松梢日出初雨晴滿
地白雲收不起溪窮路轉石徑斜隔溪遙見山人家柴門
深閉人不見暖風吹落朱藤花良工邈得無窮景坐玩令
人發深省何由築室住山間長臥雲窗弄秋影

秋夜與浦舍人敘別

林鴻

南宮飲散動經年此會羈魂各黯然霄漢故人誰更在江
潭逐客自堪憐疏燈細雨開秋宴落葉驚風攪夜眠歸去
晉陵成遠別好憑陽雁望南天

膠山雪晴

謝應芳

夜來雪深二尺強石人墮指冰蠶僵猶喜金烏兩翅凍不
折天明飛出海上之扶桑老夫晨起膠山下風景看來渾
似畫連山萬頃玉爲田隔水數家銀作舍田中築城團義
兵日高未飯饑腸鳴黃泥凍地硬如鐵白柄短鋤鏘有聲

無錫書所見
不辭受寒饑但恐虧工程將軍踏雪來點名萬夫鵠立顛
且驚馬前壯士五色棒棒頭性命鴻毛輕余生悔不習兵
法雪夜禽渠書奏捷客欄抱膝漫悲歌奈爾義兵寒若何

無錫書所見

謝應芳

丞相樓船槌大鼓鐵騎前驅猛於虎何物鼠輩敢跳梁不
畏輕遭萬鈞弩落日未落懸林梢一天殺氣風蕭騷官軍
縱火鼠入窟太湖水濶陽山高相君名位同裴度豈無將
軍如李愬兜鍪戴雲擣賊巢一夕湖船可飛度我有方寸
鐵願作將軍箭將軍三箭定陽山湖水依然淨如練

登惠山酌泉

周權

惠山鬱律九龍峯磅礴大地包鴻濛劃然一夕震風雨欲
啟靈境昭神功六丁行空怒鞭斥電火搖光飛霹靂一聲
槌裂老雲根嵌洞中開迸寒液道人盃玉深護藏鏡含萬
古凝秋光陸羽甄品親試嘗翠浪煮出松風香我來山下
討幽境自挈瓶罌汲清冷味如甘雪凍齒牙紺碧光中敲
鳳餅昏塵滌淨清靜觀心源點透詩中禪亟呼陶泓挾元
玉揮灑字字泉聲寒投閒半日聊此駐孤棹明朝又東去
紅塵人世幾浮雲鐘鼓空山自朝暮

懷惠山

錢師貞

何處春光最可憐蓮蓉溪上惠山泉梨花照水散晴雪柳

無錫金匱縣志 卷三十三
樹遶堤生暖烟神廟乞靈香蠟社泉亭留客綺羅筵而今
景物都非昔一度逢時一愴然

西城晚眺

浦源

官柳猶遮舊女牆角聲孤起送斜陽英雄百戰成寥落吳
楚平分自渺茫寒雁帶愁離塞遠暮江流恨入雲長古今
天地誰非客何用登臨獨感傷

秋日惠山寺覽景

浦源

偶到惠山寺因尋陸羽泉江皋片雨歇天際一帆懸野鹿
啣花過沙禽傍竹眠焚香同看畫煮茗共談禪茅舍炊烟
起溪城古樹連悠悠聽牧笛汎汎見漁船興發烟霞外情
生澗壑邊春申祠上坐弔古一悽然

聽松菴

韓友直

坐斷西神九脊龍一菴花竹隱僊踪碧山學士水蒼珮玉
女明星雲母春漚苾池香魚弄藻繙經院靜鶴盤松只應
同飯胡麻了更上瑤臺第幾重

李丞相讀書臺

朱昇

昔賢曾習靜爲客借僧堂聽法過苔徑攤書據石牀佛燈
然雨暗僧飯煮泉香雖自紆朱組幽期豈暫忘

過倪雲林墓

韓奕

一壠與田平青青齊麥生耕犁他日慮挂劍故人情書畫

名空在山林夢亦清不堪寒食節落日杜鵑聲

過聽松菴

顧協

偶得讀書暇來尋野衲家澗鳴風乍起山暝日初斜到樹
驚啼鳥推窗見落霞同遊鄭高士坐石共分茶

宿照菴僧舍

顧協

煮茗復煮茗笑談忘寢眠斷鐘春寺裏細雨夜燈前詩好
無多首琴殘剩幾絃年來挂行跡多半在林泉

過聽松菴

顧協

偶來林下叩松關分得禪僧半日閒孤興忽生流水外高
情聊寄白雲間炊烟晚映高低樹落日晴分遠近山今夜

西巖有明月更留清話不知還

觀柳道傳太宰留題惠山詩卷

五雲樓閣錦成堆彷彿山光百里開天上神龍行雨去日
邊驄馬踏花來千年蘭若春餘夢百世文章劫後灰惟有
石泉流不盡月明猶照鶴飛回

泰伯祠送張守

張籌

泰伯遺墟在梅李并邑依然舊山水當時三以天下讓周
家綿延八百禩可憐有廟附南郭社鼓寥寥歲時樂兵火
年來草棘深惆悵文明竟誰託張侯一郡民父母此固無
嫌我鄉土豈惟墜典與自今要使流風亦還古

遊惠山

沈 睿

春風吹我步烟霞路入蒼苔一徑斜
新綠漫添平岸水溼紅輕送過牆花
勞勞塵世尋常事隱隱烟村四五家
物理細推行樂好莫從愁裏過年華

春申君祠

王 達

昔年大邑封江東意氣傾奪何其雄
今朝送客過祠下感慨令人愁萬重
頽垣敗屋鳴寒鼠千載寥寥竟無主
片言曾見服強秦一計那知失於楚
古來辯士多殺身用智得愚良苦辛
三千珠履今何在門外青山解笑人

竹茶壚

王 達

製作精深亦可觀日供高士試龍團
輕分淇雨茗猶綠細翦湘雲粉未乾
紫笋滿甌吟骨健清風一榻鬢絲寒
啜來坐盡梅花月正是淩秋第幾竿

題成趣軒

王 紱

桑麻日已長稼穡日已成門巷蔭榆柳
隔屋縑車鳴生平寡營為遂此田園情
衣食幸不乏公賦尤寬平舉家情欣欣
淡然忘世榮力作雖云勞濁酒時共傾
豈意事高尚所樂安吾生

憶惠山

王 紱

我昔九龍山下住結廬正在雲深處
日日看山還看雲嘗

無錫金匱縣志 卷三十三
教翦卻當檐樹無端一別猿鶴羣馬蹄南北徒紛紜塵途
底事拂衣晚回首負卻山中雲

惠山煮茶

王紱

寒齋夜不眠淪茗坐鑪邊伏火煨山栗敲冰汲澗泉瓦鑪
翻白雪竹牖出青烟一啜風生腋俄驚骨已仙

竹茶鑪

王紱

僧館高閑事事幽竹編茶具淪清流氣蒸陽羨三春雨聲
帶湘江六月秋玉臼夜敲蒼雪冷紫甌晴引碧雲稠禪翁
託此重開社若箇知心是趙州

太湖春漲

馮善

震澤春深漲碧漪淨涵天影漾玻璃遙增越嶠千尋濶頓
減吳山數尺低紅泛落花通別浦綠含芳草漫長堤釣舟
昨夜歸來晚沒卻漁磯路亦迷

重遊惠山寺

聶大年

汲得春泉不滿瓢老僧相引說前朝殘碑久許遊人搨古
殿新遭劫火燒白塢荒墳寒食飯青山流水夕陽橋空餘
陸羽祠前月永夜松房照寂寥

寄朱彥昇東郭居

趙次鈞

耿耿傷離居幽情日蕭索霜寒林木變石出溪水落抱沖
思寒儔同志念非昨援琴寫素懷值子在東郭

眠雲軒

張適

山人賣藥還倦就山房寢白石作匡牀巖雲爲席枕於焉
得宴休軒楹澄夕景落月映虛白輕颺度微影灑灑毛髮
清冉冉衣裳冷無心同卷舒澤物共馳騁鶴鳴驚夢回蘿
牕夜初永

宿泗州寺

呂敏

纖月墮高林清風灑疏竹山僧沐相慰雲榻留共宿座涼
交竹陰爐溫藹蘭馥於焉爲申章庶以寫幽獨

石門

殷序

石門我來不厭煩悠然欲酌還自酌千崖冥冥送雨來萬
木紛紛向人落丹邱已會煩青鳥青田猶未見元鶴句漏
小住亦多時便欲從此凌寥廓

登惠山

張遜

洩雲蒙青山零雨暗村樹重來邱壑暮慰此清夜敘高堂
開翠戶野客當楹據疏鐘越林度清嘯逾嶺去風吟松可
聽石漱泉致飫景勝煩顧接心領各異趣悅此神爲清耿
耿至達曙

遊惠山東韶石師

尤稷

背郭山無十里餘上方樓閣鎖烟霞逕連野色迷芳草泉
帶寒香泛落花齋鉢暫收雲外菌竹鑪聊試雨前茶道人

知我耽詩癖其倚長松到日斜

仲秋八日與繼芳遊天全亭

秦旭

峨峨九龍山迢迢五湖岸扁舟弄雲水山影波底亂遙瞻
松桂林已覺風景換長吟斜川詩驚鷗忽飛散

甲辰正月六日繼芳邀社予以眩疾不赴詩以申謝

秦旭

頭白昏昏只欲眠招呼長荷社中賢餘生待斃鬼門下良
會負期人日前畏酒暫辭金谷罰酌泉重結惠山緣春湖
綠漲桃花水煩借米家書畫船

與懋成惟清公祿叔理舜明山行歸途和韻

秦旭

落梅風急放湖船六客逍遙是散仙雪白河豚新入饌鵝
黃楊柳未成綿松菴相地開詩社花市留衣當酒錢寄語
諸公慎終始莫因勤怠誤流年

立夏前一日偕梅菴立夫過新安別墅

秦旭

裏得新茶立夏前白龍橋下泛湖船紅雲壓地薔薇海黑
雨翻空玳瑁天急景任教隨逝水閒情何必問流年山林
鐘鼎粗能了更與諸公保萬全

題碧山吟社圖

吳寬

詩壇高築壬寅歲勝事遙傳大厯年買地有貲酬野衲品
泉無譜問茶仙樹藏亭子清風裏路遶雲根小洞邊賡倡
願隨諸老後結盟遲我賦歸田

盛舜臣新製竹茶鑪

吳寬

己亥之春予過無錫遊惠山入聽松菴觀竹鑪酌第二
泉煮茶嘗賦詩記其事今刑部侍郎盛公無錫人也謂
鑪出於故王舍人孟端制古而雅乃倣而爲之且自銘
其上其姪虞字舜臣者性尤好古來省其世父不遠數
千里攜以與俱予獲觀焉因取前詩次韻賞之

聽松菴裏試名泉舊物曾將活火煎載讀銘文何更古偶

觀規制宛如前緇筠信爾呈工巧暗浪從渠攪醉眠絕勝
田家盛酒具百年長共子孫全

野翁山居

施廉

清晨梳我頭有客過茅宇呼兒具尊疊展席集朋侶鉤簾
對青山瀟瀟落疏雨可人期不來相思渺何許

與余民用潘時覲同遊惠山

楊璿

前朝湛氏宅十載一經行境勝多題詠僧閑少送迎松風
禪榻靜花雨石牀平共飲山中水蕭然遠世情

陸墟別業

楊璿

文筆峰前湖水西幽棲地僻少輪蹄花間穉子坐垂釣竹

無錫金匱縣志 卷三十三
下老翁行灌畦酒熟漫判金谷飲詩成先許錦牋題已聞
孫笋如蓬賤更說雕胡似掌齊

雨憩聽松閣

徐問

山雨正冥冥山僧開翠屏水拖千澗白雲約半峯青石髓
分茶鼎塵心靜佛經松風坐來定餘韻遶檐楹

題孟氏惠麓小隱

秦夔

亂後家何在歸來始定居丹心三尺劔白首五車書戚畹
名猶在雲臺業未疏結廬來小隱歲晚足耕鋤

錫谷書堂

陳處士公
懋別墅

秦夔

錫谷逶迤山水幽中有隱者之飛樓二泉烟霞半斂夕九

龍爽氣常宜秋吟邊落日動遐思望裏平湖消客愁山靈
珍重此訶護更約臨風來上頭

房

復竹茶鑪

自注竹茶鑪淪落已五十餘年眞公徒孫
宏上人訪求得之秋林楊公家仍攜歸山

秦夔

烹茶只合伴枯禪誤落人間五十年華屋夢醒塵冉冉湘
江雲冷月娟娟歸來白壁原無玷老去青山最有緣從此
遠公須愛惜願同衣鉢永相傳

湖南草堂

秦夔

竹裏衡門掩翠微自將荷葉製春衣園林雨過梅初熟池
館風輕燕學飛濁酒半缸怕我老短琴三弄識人稀明朝

準買湖南權擬向沙頭理釣絲

溪橋散步

秦 爽

老去觀書興易闌綠陰清晝況多閒杖藜扶我溪橋步看
盡湖南十里山

龔行儉以扇索畫

秦 爽

行過谿橋日欲低綠陰滿地郭公啼微風輕颺茶烟起知
有人家在竹西

龔守誠山莊邀賞桃花和韻

秦 鏗

桃花何似武陵溪試唱新吟續舊題遊舫半通沙市外故
人多在畫橋西山橫翠靄連書屋春釀紅香拂杖藜酒盡
一尊歸去晚晴郊散步夕陽低

寄題二泉亭爲邵泉齋作

李東陽

江神夜泣山靈嘯帝遣神工鑿山竅飛流出地聲灑空泉
水下與中泠通江邊老翁不知姓手著茶經親鑒定金山
之外更無泉坐令匡廬瀑布空高懸地官侍郎心似水平
生品泉如品士似云江水不同清此山自得青金精尋山
浚泉發清寫原是江南好奇者山高水絕詩亦奇鳴金噴
玉無停時我山曾過泉不酌夢枕峻嶒漱灑瀉我歌泉和
兩知音吁嗟乎誰哉更識泉齋心

盛舜臣新製竹茶鑪和韻

李東陽

無錫金匱縣志 卷三十三
石罇曾分裊裊泉裏茶添火試同煎形模豈必隨人後鑿
賞何因置我前秋共林僧燒葉坐夜留山客聽松眠王家
舊物今雖在竹缺砂崩恐未全

惠山泉歌和西涯先生韻

喬宇

空山散步舒清嘯澗響泠泠出天竅澄波靜影涵遠空一
脈上與銀河通山稱惠山誰所姓卻憶九川初浚定後人
品作第二泉名共瀑布廬山懸知君素志在山水同是坡
翁門下士滄浪調翻宮羽清夜泣江怪號山精臨泉浩歌
一傾瀉澗視古今誰作者我生未老空好奇此山此水遊
何時感君釀泉爲君酌遠意芬芳寄灑澗寥寥川上有遺
音洗耳避世誠何心

謝友人送惠山泉

李夢陽

故人何方來來自錫山谷暑行四千里致我泉一斛清泠
不異在山時中涵石子蕪苔綠越州花瓷熟燕竹陽羨紫
芽出包束故人好我手自煎分坐庭隅候湯熟瀉器寒雪
碎繞腸車輪鳴一舉煩鬱釋再舉毛骨輕三舉不敢嚙恐
生羽翼隨風行我聞茲泉世無匹夢寐求之不能得詩乞
翻愧蘇家才驛送兼無衛公力又虞誤載石頭波頓令眞
晶無顏色感君酌我向君揖一勺橫澆萬古臆嗟嗟此意
誰復知極目江雲三歎息逆想水師初具船山靈涕洟上

訴天蟠竦委蛇晴貫窗蛟鼉睥睨宵近舫淮浮泗泛梅雨
蒸車輸馬曳炎塵煎開甕滴滴皆新泉敢謂君非山水僊
或我埃垢入肺腑倩君攜此親洗滌酬君合書躉尾帖九
原誰起黃庭堅

聽松

邵寶

聽松復聽松松聲在高閣閣成四十年聽者今如昨風來
春濤生風去秋濤落當其無風時蕭然亦微作聽者聽於
斯冥心對寥廓

和西涯先生題二泉亭韻寄答

邵寶

擊石長歌復長嘯山無人聲泉有竅詩人曾謂茲山空又
聞山與南海通向來泉托山人姓公爲收名名始定石池
左右多檻泉東流迤邐非突還非縣公門如海納川水肯
向東方遺一士出山還似在山清中有石子星之精別公
無言還獨寫公乃題詩贈行者登高盡得今古奇我歌合
向觀泉時年年壽公泉一酌公每書來問澆澆援琴欲奏
山中音水風吹月千里無還心

石牀行

邵寶

惠山石牀古有之聲聲松子金風時皮休題詩李冰篆千
秋并作山中奇山菴之名本緣此石也移來應偶爾遊人
玩侮等尋常識者共憐非所止牆西松樹幾百春大圍三

人小二人此松此石雅相友乾坤無心物有神二泉山人
愛觀物謂物皆然胡獨不立破頽垣遣往參卻笑他年兩
湮鬱君不見赤松子黃石公姓名久落荒唐中酒酣擊節
愛清嘯春深繡嶺回天風

青山歌

邵寶

吾聞太湖之上羣山叢參差一碧皆摩空茲山乃獨擅名
字兩洞庭北夫椒東南條西來幾經絡東將到海還盤礴
左旋右引真有情古色疑從天上落望湖亭如一巢小萬
頃烟濤連樹杪七十二峯名者誰今古興亡雲杳杳援山
曾和恒山歌斷碑破冢如余何振衣獨上絕高處滄浪調
遠清風多讀詔歸來病初起拭目江湖千萬里丹邱信有
在人間茲山茲山毋乃是老僧報我山花春題詩爲報山
中人他日歌詞已陳迹謂君再拂湖邊石吾嘗一題少室
三匡廬不知山靈謂我今何如

石塘觀水謠

邵寶

東南風湖水生西北風湖水落昨日今日皆天風不見水
往來但見郊原成一壑海深如不容洪流橫復縱都水使
者難施功三江不爲江震澤不爲澤岳陽何處樓長嘯洞
庭窄君不見山東不雨夏接春赤地千里還愁人

華藏寺

邵寶

湧金亭倚水雲高三月餘寒尚綈袍古寺客來敲柳癭老
僧門外掃松毛天風欲定還舟楫春色無端謾酒醪獨立
蒼茫思何限吳山烟樹越山濤

燦山明陽觀

邵寶

行過青山復璨山幾層雲磴幾松關中巖泉落龍猶臥上
界壇高鶴未還十月風清雙笛遠五湖波濶一舟閒憑君
看我題名處應在丹崖萬仞間

希夷道院

秦霖

圖南曾憩迹作院號希夷地古莓苔老林春草木滋榻閒
仙久化人到鶴先知願借西亭竹吟鐫小體詩

築鳳谷行窩成

秦金

名山投老住卜築有行窩曲磴盤幽石長松罨碧蘿峯高
看鳥度徑僻少人過清夢泉聲裏何緣聽玉珂

歸途登惠山時烟雨空濛眾有難色余獨奮往

沈周

惠山怪我昨徑去歸來欲登卻作雨溼雲隔眼失高翠掉
頭不顧真巢父願治笠屐往慰謝眾慮霑濡吾莫阻我言
惠不在天上行不畏難當至耳呼童挈擔客乃從一段奇
蹤自伊始西湖山色奇空濛當與此山移此語

蠡湖

孫一元

無錫金匱縣志 卷三十三
初日浮高樹晴鷗散淺沙挂帆湖水上聞笛野漁家岸折
菰蒲合雲迷山郭斜芳洲動幽興自起采蘋花

膠山萬玉亭

唐寅

萬玉一亭子山僧清可知雲陰消暑地月影弄秋時筍出
足薦酒客來堪刻詩何當竟深造莫問我爲誰

石門

顧可久

達人不嬰物雅好在邱園晨興念山遊邀客觀石門緣崖
屢登頓度徑奮層騫懷新意轉勝悲往鑒獨存前瞻緬江
嶼俯瞰臨郊原石竇紅泉細鳥道白雲屯昭曠蕩胸臆窈
窕屏囂喧朋簪驚絕倒仙舄遙翩翩復此泉上酌谷響思

窮源非君多道韻表靈誰能論來者其自今風流眷彌敦
倘事詮圖牒聊用嗣所言

冬日惠山作

蔣孝

夙負山水癖惠麓成獨往高原木葉盡巖岫出林莽靈泉
散古鬚細石發清響寒蕪澗道遠落照洞冥朗捫蘿入精
廬欲覓生公講從茲寶林隱日久寄遐想

寄題無錫呂仲仁碧山居

邊貢

梁溪渺渺錫山蒼南去天涯客路長霜下海門潮漸落雨
深江甸橘初黃城池舊識延陵郡風俗猶傳至德鄉卻見
吏曹頻寄語一年秋色負重陽

香山寺

莫止

香界追攀十載曾，薜蘿深處翠微層。
齊梁古跡談雙樹，水月元心鏡一燈。
山鳥弄晴春冉冉，閣雲凝碧晝冥冥。
投簪莫訝賓朋少，猶有逢迎白社僧。

秋日崇安僧舍

王問

一雨忽復陽秋至，尙殘暑偶與文翰虛。
假此空門住臨池，生晝涼幽香蔭叢樹。
嘒嘒亂蟬鳴自得，林中趣瀟灑塵迹遺。
沖漠道心悟遂結，無生緣日暮忘所去。

與楊世卿至寶界山居

王問

遙水映微旭，溼雲猶在山。幽居隱深谷，空濛烟樹間。
歲序忽復變，樵歌常自閒。與子不忍去，躊躇暮方還。

洞虛錢道士樓居

王問

涼風動高梧，登樓挹清暑。於心無所營，永日自閒處。
流雲生遠空，當晝忽微雨。江禽帶溼回，枝上相對語。

栖雲山房

王問

春晴出門去，林花亦已繁。移舟泊烟岸，步履至空門。
日暮向東院，歸鳥寂不喧。自得澗中意，勿與山僧言。

清溪莊

王問

使君初解綬，小隱碧溪深。以我蟪蛄歎，知君薜蘿心。
涼風度虛閣，明月滿前林。歲暮垂楊岸，扁舟許獨尋。

題惠山秦園

茅坤

江南佳麗地，幻石與瑀梁。獨愛茲園勝，偏多野興長。洞花迷日月，巖樹雜隋唐。寄語陶元亮，無憐三徑荒。採藥逢鵝蕊，穿林坐女蘿。雲霞曳冠蓋，水竹傍巖阿。客過花偏落，興來鳥自歌。猶言曲池上，已可狎烟波。

王繼山考功載酒惠山園亭邀鎮山司空同宴集

茅坤

席擁尚書履，林深帝梵家。軒楹半祗樹，笙吹入空花。日漏松陰薄，泉穿石徑斜。前頭虎谿路，長嘯躡飛霞。

秋夜送戶部家叔登黃埠

華察

離亭對衰柳，落日送行客。秋聲在孤嶼，興來恣採涉。臺殿澄夕陰，明燈照禪室。夜靜山月高，潭虛映空色。水鏡清道心，超然垢氛滌。浮雲亦何意，聚散隨所適。風葉逐歸篷，霜空起寒笛。

泛濠湖

華察

載酒隨輕波，演漾情未已。夕陽映前川，櫂入微茫裏。散髮弄烟空，竊比鴟夷子。沙際暝色來，歸棹還自理。何處滄浪歌，因之一洗耳。

題姚潛坤山人茶夢閣

華察

山人耻獨醒，啜茗亦自醉。清風敞高閣，隱几頽然睡。平生

在苦吟冥想入寤寐殷勤夢裏言欵曲詩中事神超萬象
融意愜情景備天籟本希聲筌蹄一何贅悠悠池草心干
秋可同致

惠山寺與施子羽話別

華察

看山不覺暝月出禪林幽夜靜見空色身閒忘去留疎鐘
隔雲度殘葉映泉流此地欲為別諸天生暮愁

續碧山吟社次韻

華察

曾聞高蹈碧山南試叩山僧事尚諳雪積林扉寒不掃月
明空水夜相涵吟壇久廢名猶在策杖重來路可探為看
當年誦經處惟餘松影護禪龕

希夷道院

施漸

何為此休暇物境俱蕭然幽磬時一響閒庭無雜喧春風
林中度桃李滿窗前未能游方外數與靜者便秉姿類絕
俗學道未忘筌往志謂易竟來日遂遷延踪跡一繫此當
為同心愆

華補菴菰川莊

施漸

宛然一水外已是隔塵緣深竹嘗留客幽齋頗近禪疎林
澹殘照遠岫起寒烟席上候芭醉知君好講玄

謁顧洞陽公祠

海瑞

兩朝崇祀廟模新抗疏名傳骨鯁臣志矢回天曾叩馬功

同浴日再批鱗三生不改冰霜操萬死長留社稷身世德
尚餘清白在承家還見有麒麟

過王九巖讀書圃

唐順之

微日挂孤壁四山何悄然因穿蘿徑去忽造竹林邊叢木
深寒氣平蕪澹野烟徘徊興復盡還就茆齋眠

顧刺史清溪莊三首

唐順之

阮生常避俗平子正歸田種秫供生事爲樓貯列仙沙行
隨鷺跡湖泛趁漁船月下聞高詠應多感興篇
城郭往來久獨憐湖上居素封千樹橘白首一牀書山客
秋分蜜溪暈夜捕魚橫經豈不貴此樂復何如

地卽梁鴻宅溪連范蠡湖霜天榮橘柚秋水戲鷗鳧從宦
元非巧名園亦是愚欣君遂始願繞屋樹枌榆

泛梁溪

王立道

幽尋極寥廓理棹清溪長落日照孤嶼微風生夜涼須臾
遠氛淨百里開湖光漁子相傍宿月明歌滄浪採芳不能
浴悄然悲沅湘

清溪莊

王立道

日入理輕棹所欲避人諠沿洞清溪側迢迢見孤村始疑
松菊徑復似桃花源林際見明月浦口聞驚猿嘯傲倚修
竹步履隨芳蓀本求於陵隱欣得辟疆園杳與塵世隔將

同漁父言

前湯菴

王立道

僻地多逢寺秋花滿石壇僧閒縫衲坐客到出門看失姓
離羣久躬耕乞食難清言殊未厭車馬去長安

自題山莊

賈應壁

無那青山笑白頭抽簪聊復小句留不知陸羽泉南社何
似黃岡縣裏樓風月無邊多暇日溪山第一况新秋藕花
開落閒門掩飛去飛來幾點鷗

東林菴

秦植

涼風吹客衣近午東林下禪房秋意閒香泉鉢中瀉隔花

聞磬聲老僧掩關罷何為不染心真心無言借獨據一龕
雲吾來已解夏

斗門

秦植

野塘迴斗靜春權漫相尋流水烟局隔落花人語深牛羊
初散牧桑柘乍團陰未得閒偕隱滄洲盡日心

移家湖上作

王懋明

夙昔厭喧擾湖壖聊聚廬五柳陰到門客子攜家初歡言
治隱計織履兼藝蔬妻孥哂荒陋而我良自舒魚鳥適幽
性水竹澄貧居開簾峯翠繁停舟潭月虛心與勝槩遇跡
將城府疏養生黃精飯銷憂老氏書了悟損益理何須儻

石儲食力愧伯鸞攻文愧相如所長惟達命天地甯窮子

惠山寺

陸弼

野寺落花新何來對角中鶯啼雙樹午鱸薦五湖春白噴
多幽事青尊幾故人天涯堪一醉容易隔風塵

春晚登惠山

郭諫臣

花落清明後扁舟載酒來山從一徑入寺遶萬松迴池上
泉聲細樽前暮色催杖頭錢未罄沾取盡餘杯

秋晚梁谿道中

郭諫臣

向晚梁谿道秋光滿畫船山明低落日波淨倒涵天遠市
分殘雨叢林起暮烟同行俱故舊杯酒共留連

茶夢閣和姚山人潛坤韻

秦梁

山人愛習靜棲遲有高閣臥寐想烟蘿所志在巖壑桐陰
碧四圍孤琴望寥廓日長自草元道勝忘寂寞

和三唐人惠山詩

錄一

秦梁

烟光被層巒芳氣寒清樾松門僧未歸石徑泉不絕禪心
覺無生塵機坐來滅長天澹澄湖微雲逗涼月林虛夕吹
爽壑幽靈籟發稅駕從茲遊千秋同一轍

和三唐人惠山詩

錄二

鄒迪光

金商薄秋麓桂樹凌清蒼緒風叩元壑爽籟奔虛堂俯聽
山蟲鳴仰視林雁翔方塘逗玉液粼粼浮清光鑑貌燭毛

髮漱齒流芳香買山未可得招隱焉能忘

金仙棲石龕珠宮結靈樾黃葉樵路深綠苔人履絕巖花
見空色山雲悟生滅客來嘯遠風僧行踏涼月香燈十地
明寶鐸四天發已是兜率宮詎想襄城轍

春暮新霽偕友人步入惠山憩秦氏園亭

鄒迪光

初陽革故陰同人揆心賞總轡陟原隰谷風薦五兩牽裾
襲芳郁伐木遞遐響林葉漸蒙密巖葩盡升長鉤雲屢迴
複名園出蒼莽旋從童穉入復偕麇犢往巖氣乍掃滌石
樓發清爽矚遠無近尋臨深有餘想仁智樂在斯意適忘

歸鞅

家園卽事

鄒迪光

買得菟裘已十年揭來歸隱共周旋爲山直割雲頭石鑿
沼頻偷地底泉清梵自天投寶篆疏鐘挾雨答朱絃生平
不少蛾眉妬剩有烟霞與作緣

王養和同遊寶界山登嘯臺因懷故僉事王先生作

王穉登

涼風吹微雲曠然舒客懷美人招我遊載酒青山隈綠波
如魚鱗畫舫相沿洞前賢不可接後者誰當來別墅倚石
壁樓觀鬱崔巍星壇饒寒松巖屋枕蒼苔諸孫二三人一

一非凡才君尤惠好我然諾無相猜明月飛上山照見尊
中酩暮壑烟中流泔泔有餘哀鳥聚丹霞林蟲啼白露階
悲往念逝者太息以徘徊遠慚蘇門嘯安用登高臺

贈秦舜峯中丞

王穉登

勳名虔楚川榛芳太息中朝諫
燄騰天地何心容放逐湖
山有興集賓朋燈前看劔重
回首花下開尊獨拊膺近日
投竿溪上住漁郎猶識舊中丞

大池別業

施策

草堂棲隱北山阿三月春寒未試羅
遶徑松杉林氣合滿
庭竹葉雨聲多蒼苔路滑人希到
白晝窗虛鳥自過住世
卻求清淨理不妨寂寞臥烟蘿

月坡成

高攀龍

浩浩月初上月坡正受之以我無營心
當此獨坐時爲籌
世中事無樂可代茲長林寒風息春氣
藹如斯萬族各萌
動我心豈不知俯視方輿靜仰觀圓象
馳靈襟旣無際一
形安足私持以畀大鈞榮悴非所思

水居三首

錄一

高攀龍

少敦詩書好長嗜山水娛一朝謝簪組
而來居菰蘆青山
當我戶流水遶我廬窗中達四野喜無
垣壁拘桃柳植長
堤菱荷被廣渠徒侶有漁父比鄰惟
田夫虛堂白日靜恍

若游黃虞兀兀日趺坐忻忻時讀書會茲動靜理常得情性舒恬然以卒歲去此將焉如

湖上閑居季思子往適至

高攀龍

正爾山水閒念吾烟霞友春風吹微波日暮倚楊柳我友惠然至童僕喜奔走相別歎經時相逢慮非久所歡得晤言欲言仍無有默默各自怡一室閒相偶夜深不能寐明月在東牖

水居

高攀龍

有客風塵歸去來兀然孤坐水中臺九龍山似翠屏立五里湖如明鏡開春雨鱖肥菰米飯秋風鱸美菊花盃蒹葭白露伊人在恣向江天亦快哉

幽居無事不開顏爲惜春光只閉關兩眼情親惟綠野一生心契有青山桃花灼灼鳥啼寂柳絮飛飛人意閒緩步溪頭看落日月明深竹抱琴還

庚子正月吳子往見過同訪高存之於漆湖

歸子慕

令節思故人流光懼蹉跎心在隰桑篇三復當如何忽聞叩門聲良友遠見過攜我訪同志詰朝鼓輕舫情殷無遙路信宿踰關河依然漆湖上春山渺晴波主人愉愉如兼以風日和風和卷簾坐開尊鳥來過忘飲飲更適不覺芳

無金全圖鼎元 卷三十三
顏酖階前山茶花落英何其多

西林詩六首

安紹芳

芳蘭冒幽石清芬散巖阿相思隔美人緝佩當如何庶保

空谷姿幸免當門鋤

蘭巖

石道蒼翠間窈窕絕塵鞅麋鹿日以驕薜荔日以長獨有

青巖雲倏忽自來往

石道

朝曦出東嶺明霞相與鮮松露溼未晞花源澹浮烟道人

隔巖宿獨藉孤雲眠

晨光
塢

結茆空山中冥心契元寂時聞虛籟生復聞虛籟息倦開

齊物篇高枕青山色

虛籟
堂

層臺一何曠修竹有爽色披襟清風來往往墮巾幘白雲

自滿地上有蒼麕跡

爽臺

乞得袈裟地青山如沃州欲知無著心面面清溪流稍容

支許輩乘筏來溪頭

沃邱

和西林二首

葉之芳

長松夾修道芳草寒未歇朝落東峯雲暮照西原月獨鶴

步不鳴主人清嘯發尋仙可長往將從鍊金骨

鶴徑

林木一何榮軒居一何敞山空白雲散遊子發孤想已感

霜烏啼復值秋聲響無使心傷悲遂歇邱中賞

榮木
軒

贈鄒公履

葉之芳

鄒生天下士落拓竟佯狂擊劍有奇術賦詩多樂方輸錢
九邊上結客五陵旁欲殺亦何意休令蕭艾傷

題五湖水居用高存之韻

安希范

紱冕情原淡邱園道豈窮世從驕腐鼠君自托冥鴻夾岸
移新竹開畦種晚菘扁舟隨所適春事五湖中

福延菴贈振延上人

顧允成

太虛石洞居孤絕少人依遠客攜琴過逢師乞食歸一蒲
青草上四面白雲飛盡日無言說岳花落滿衣

東林道南書院志感

陳繼孺

城頭歸羽夕陽時不是深秋也自悲川上水流君子澤階

前草護黨人碑魚龍混雜原難辨玉石俱焚祇為誰獨有
講堂三四柳蕭條枝葉向東垂

譚友夏自越歸晤於錫山

鍾惺

衣邊秋未去霜氣自湖陰凡子吟能及皆予夢所尋分風
來往路計日別離心各指梁溪水寒烟共一深

望亭舟中感興

吳兆

水國蠶桑早春山蕨笋肥誰憐行路客著盡離家衣村犬
迎舟吠田烏繞耜飛悠悠望遠岫卻羨暮雲歸

同吳次尾過東林廢址

顧杲

秋陽暴東林巍然道南峙先帝重賢者拆毀不及此講堂

無錫金匱縣志 卷三十三
遂荒蕪斯道亦已矣小人紊忠奸君子雜怒喜朝野學漸
絕吾汝乃奮起一二同心人往往隔千里春秋偶相遇必
求是非理庶幾化黨同他日能不倚悲風自南來衰草滿
基址垣墉昔誰勤何以爲後死

秋入山寺訪廬山德公

馬瑞

午鐘新雨後清響出空林忽與遠公遇共茲塵外心人來
佛地少秋入寺門深一笑前溪別幽蹤不可尋

陽溪丙舍

嚴紹宗

何必蕭騷賦遠遊柴門流水日悠悠人逢末俗營三窟天
置吾儕自一邱儒不楚坑原自賤書經秦火尙堪收羝羊
自識藩閼意涕淚何須學楚囚

烟波十里問吾廬曲曲蘆花入小渠聊復藝蔬成野圃偶
然種竹卽幽居鴻冥誰復爭周粟牛角嘗懸是漢書溪水
粼粼試芳餌幽風輸我一竿漁

過顧子方故居

黃家舒

擊筑悲歌記昔時烏啼月落酒盈卮羊曇悔踏西州路虎
賁空餘北海思池館尙存書散盡衣冠非故燕來遲田光
刎首荆卿死寂寞西風哭漸離

喻玉泉先生墓下歌

錢肅潤

南宋天子英明姿敷天袒者左手支政府得人兼馭將內

外戮力交維持喻公矯矯應運出往來畫計多雄奇憶自建炎始釋褐蓋棺之年在淳熙中閱半遷或半調力主正論迥衰靡紹興四年金師至六龍蜿蜿爭驅馳微公一言念歸路一跌安知車不脂壯哉宣撫長城寄江淮荆浙惟其司兩人相逢拱手笑迺見公力非等夷功名旣埒且並相公謂並相非其宜趙退張繼氣乃永毋令兩正滋嫌疑厥後語亦稍稍驗賢者慮患真無遺無何姦檜唱和議長城自壞屠熊羆公謂九成入對言其欺同時謫訕人有七檜乃劾之貶以差檜居相位十九稔屢恣放逐徒行私公於進退久已豫衡陽謫去惟其時久之命下

大宗正帝曰爾樗能有爲煌煌誥敕親自定濡染御筆揮綸絲高宗寶翰不易得字畫天矯蟠蛟螭當時褒賜及韓岳天言赫赫懸之旗然彼字數皆有限惟公一卷多其辭帝心簡注良有在工師繩墨非虛期館閣多年屈復起非公重任誰肩仔公少爲學慕伊洛長遇文靖眞吾師此中衣鉢原有主東南倡道昭來茲學宮片席奉俎豆淵源立雪非聞知我來城東弔公墓路人空指麗牲碑香火荒涼傍郊郭衣冠寂寞埋土壘一抔聊爾寄遺澤惟公靈爽無不之

過千休館訪大音先生

張夏

先生竟學道高臥自園林一卷姬公易自注時方注易千秋表聖

心斯文還未喪墜緒已難尋自注謂東林書院賴有靈巖叟瑤華

惠好音自注吳下徐昭法隱居靈巖土室中與先生初不相識獨以書問往來

和王孟端送真上人還惠山

釋廣益

故人迎候久料亦恨遲還建業吟邊雨梁溪夢裏山室空

龍臥澤松暝虎巡關塵網慙偏見禪心去住閒

聽松菴次王達善韻

釋普真

泉上歸來已一年萬松影裏屋三椽坐殘白日渾無事買

斷清風不費錢猿墮山崖尋果樹鶴穿林逕避茶烟王猷

識我平生意時寄新詩一兩篇

山居

釋法藏

覓得三峯好卜棲月涼疏影到階齊山空萬籟晚來寂臥

聽隔林啼竹雞

花落軍持入澗香寥寥淨域絕思量不知下界黃昏近獨

向西窗戀夕陽

外審軍持人師晉寧縣令... 縣志林節竹縣... 景縣三峯我小樹...	景縣三峯我小樹...	景縣三峯我小樹...	景縣三峯我小樹...	景縣三峯我小樹...	景縣三峯我小樹...	景縣三峯我小樹...	景縣三峯我小樹...
--	------------	------------	------------	------------	------------	------------	------------

無錫金匱縣志卷三十三終

